

अथ चतुर्थं मण्डलम् ।

प्रथमोऽनुवाकः

सू० १ । १०

(१) प्रथमं सूक्तम्

(१-२०) विंशत्यृचस्यास्य सूक्तस्य गौतमो वामदेव ऋषिः । (१, ६-२०)
प्रथमर्चः षष्ठ्यादिपञ्चदशानाञ्चाग्निः (२-५) द्वितीयादिचतसृणाञ्चाग्निर्वरुणो वा
देवता । (१) प्रथमर्च अष्टिः (२) द्वितीयाया अतिजगती (३) तृतीयाया धृतिः
(४-२०) चतुर्थ्यादिसप्तदशानाञ्च त्रिष्टुप् छन्दांसि
त्वां ह्यग्ने सदमित् समन्यवो देवासो देवमरति न्येरि इति क्रत्वा न्येरिरे ।
अमर्त्यं यजत् मर्त्येष्व देवमादेवं जनत् प्रचेतसं विश्वमादेवं जनत् प्रचेतसम्
१

स भ्रातरं वरुणमग्र आ ववृत्स्व देवाँ अच्छा सुमती यज्ञवनसं ज्येष्ठं
यज्ञवनसम् । ऋतावानमादित्यं चर्षणीधृतं राजानं चर्षणीधृतम् २
सखे सखायमभ्या ववृत्स्वाशं न चक्रं रथ्यैव रंह्यास्मभ्यं दस्म रंह्या ।
अग्ने मृळीकं वरुणे सचा विदो मरुत्सु विश्वभानुषु ।
तोकार्यं तुजे शशुचान् शं कृध्यस्मभ्यं दस्म शं कृधि ३
त्वं नो अग्ने वरुणस्य विद्वान् देवस्य हेळोऽव यासिसीष्ठाः ।
यजिष्ठो वह्नितमः शोशुचानो विश्वा द्वेषांसि प्र मुमुग्ध्यस्मत् ४
स त्वं नो अग्नेऽवमो भवोती नेदिष्ठो अस्या उषसो व्युष्टौ ।
अव यद्व नो वरुणं रराणो वीहि मृळीकं सुहवो न एधि ५
अस्य श्रेष्ठा सुभगस्य सदृग् देवस्य चित्रतमा मर्त्येषु ।
शुचिं घृतं न तप्तमघ्न्यायाः स्पार्हा देवस्य मंहनैव धेनोः ६
त्रिरस्य ता परमा सन्ति सत्या स्पार्हा देवस्य जनिमान्यग्नेः ।
अनन्ते अन्तः परिवीत आगा च्छुचिः शक्रो अर्यो रोरुचानः ७
स दूतो विश्वेदभि वष्टि सद्या होता हिरण्यरथो रंसुजिह्वः ।
रोहिदंशो वपुष्यो विभावा सदा रणवः पितुमतीव संसत् ८
स चैतयन्मनुषो यज्ञबन्धुः प्र तं मृह्या रशनया नयन्ति ।
स चैत्यस्य दुर्यासु सार्धन् देवो मर्तस्य सधनित्वमाप ९
स तू नो अग्निर्नयतु प्रजान् नच्छा रत्नं देवभक्तं यदस्य ।
धिया यद् विश्वे अमृता अकृण्वन् द्यौष्पिता जनिता सत्यमुक्षन् १०

स जायत प्रथमः पस्त्यासु महो बुध्ने रजसो अस्य योनौ ।
अपादशीर्षा गुहमानो अन्ता ऽऽयोयुवानो वृषभस्य नीळे ११
प्र शर्ध आर्त प्रथमं विपन्याँ ऋतस्य योना वृषभस्य नीळे ।
स्पाहो युवा वपुष्यो विभावा सप्त प्रियासोऽजनयन्त वृष्णौ १२
अस्माकमत्र पितरो मनुष्या अभि प्र सैदुर्ऋतमाशुषाणाः ।
अश्मव्रजाः सुदुघा वृत्रे अन्त रुदुस्त्रा आजन्नुषसौ हुवानाः १३
ते मर्मजत ददृवांसो अद्रिं तदेषामन्ये अभितो वि वौचन् ।
पश्वयन्त्रासो अभि कारमर्चन् विदन्त ज्योतिश्चकृपन्त धीभिः १४
ते गव्यता मनसा दृध्रमुब्धं गा यैमानं परि षन्तमद्रिम् ।
दृळ्हं नरो वचसा दैव्यै न व्रजं गोमन्तमुशिजो वि वव्रुः १५
ते मन्वत प्रथमं नाम धेनो स्त्रिः सप्त मातुः परमाणि विन्दन् ।
तजान्तीरभ्यनूषत् वा आविर्भुवदरुणीर्यशसा गोः १६
नेशत् तमो दुधितं रोचत् द्यौ रुद् देव्या उषसौ भानुरर्त ।
आ सूर्यो बृहतस्तिष्ठदजाँ ऋजु मर्तेषु वृजिना च पश्यन् १७
आदित् पश्चा बुबुधाना व्यरयन्नादिद् रत्नं धारयन्त द्युभक्तम् ।
विश्वे विश्वासु दुर्यासु देवा मित्रं धिये वरुण सत्यमस्तु १८
अच्छा वोचेय शुशुचानमग्निं होतारं विश्वभरसं यजिष्ठम् ।
शुच्यूधो अतृणन्न गवा मन्धो न पूतं परिषिक्तमंशोः १९
विश्वेषामदितिर्यज्ञियानां विश्वेषामतिथिर्मानुषाणाम् ।
अग्निर्देवानामव आवृणानः सुमृळीको भवतु जातवेदाः २०

(२) द्वितीयं सूक्तम्

(१-२०) विंशत्यृचस्यास्य सूक्तस्य गौतमो वामदेव ऋषिः । अग्निर्देवता ।

त्रिष्टुप् छन्दः

यो मर्त्येष्वमृतं ऋतावा देवो देवेष्वरतिर्निधायि ।
होता यजिष्ठो महा शचध्यै हव्यैरग्निर्मनुष ईर्यध्यै १
इह त्वं सूनो सहसो नो अद्य जातो जाता उभयाँ अन्तरंग्रे ।
दूत ईयसे युयुजान ऋष्व ऋजुमुष्कान् वृषणः शक्रांश्च २
अत्या वृधस्त्रू रोहिता घृतस्त्रू ऋतस्य मन्ये मनसा जविष्ठा ।
अन्तरीयसे अरुषा युजानो युष्मांश्च देवान् विश आ च मर्तान् ३

अर्यमणं वरुणं मित्रमेषा मिन्द्राविष्णू मरुतो अश्विनोत ।
 स्वश्वो अग्ने सुरथः सुराधा एदु वह सुहविषे जनाय ४
 गोमाँ अग्नेऽविमाँ अश्वी यज्ञो नृवत्सखा सदमिदप्रमृष्यः ।
 इळावाँ एषो असुर प्रजावान् दीर्घो रयिः पृथुबुधः सभावान् ५
 यस्त इध्मं जभरत् सिष्विदानो मूर्धानं वा ततपते त्वाया ।
 भुवस्तस्य स्वतवाँः पायुरग्ने विश्वस्मात् सीमघायत उरुष्य ६
 यस्ते भरादन्नियते चिदन्न निशिषन्मन्द्रमतिथिमुदीरत् ।
 आ देव्युरिनधते दुरोणे तस्मिन् रयिर्ध्रुवो अस्तु दास्वान् ७
 यस्त्वा दोषा य उषसि प्रशंसात् प्रियं वा त्वा कृणवते हविष्मान् ।
 अश्वो न स्वे दम् आ हेम्यावान् तमंहसः पीपरो दाश्वासम् ८
 यस्तुभ्यमग्ने अमृताय दाशद् दुवस्त्वे कृणवते यतस्तुक ।
 न स राया शशमानो वि यौष नैनमंहः परि वरदघायोः ९
 यस्य त्वमग्ने अध्वरं जुजौषो देवो मर्तस्य सुधितं रराणः ।
 प्रीतेदसद्धोत्रा सा यविष्ठाऽसाम् यस्य विधतो वृधासः १०
 चित्तिमचित्तिं चिनवद् वि विद्वान् पृष्ठेव वीता वृजिना च मर्तान् ।
 राये च नः स्वपत्याय देव दितिं च रास्वादितिमुरुष्य ११
 क्विं शशासुः क्वयोऽदब्धा निधारयन्तो दुर्यास्वायोः ।
 अतस्त्वं दृश्याँ अग्न एतान् पडिभः पश्येरद्धताँ अर्य एवैः १२
 त्वमग्ने वाघते सुप्रणीतिः सुतसौमाय विधते यविष्ठ ।
 रत्नं भर शशमानाय घृष्वे पृथु श्वन्द्रमवसे चर्षणिप्राः १३
 अधा ह यद् व्यमग्ने त्वाया पडिभर्हस्तैभिश्चकृमा तनूभिः ।
 रथं न क्रन्तो अपसा भुरिजो अर्तं येमुः सुर्ध्व आशुषाणाः १४
 अधा मातुरुषसः सप्त विप्रा जायेमहि प्रथमा वेधसो नृचफढन् ।
 दिवस्पुत्रा अङ्गिरसो भवेमाऽद्रिं रुजेम धनिनं शचन्तः १५
 अधा यथा नः पितरः परासः प्रत्वासौ अग्न अतमाँशुषाणाः ।
 शुचीदयन् दीर्घितिमुक्थशासः क्षामा भिन्दन्तो अरुणीरप वन् १६
 सुकर्माणः सुरुचो देवयन्तो ऽयो न देवा जनिमा धमन्तः ।
 शचन्तो अग्निं ववृधन्त इन्द्रं मूर्वं गव्यं परिषदन्तो अगमन् १७
 आ यूथेव क्षुमर्ति पश्वो अख्यद् देवानां यज्ञनिमान्त्युग्र ।
 मर्तानां चिदुर्वशीरकृप्रन् वृधे चिदुर्य उपरस्यायोः १८

अकर्म ते स्वपंसो अभूम ऋतमवस्रनुषसो विभातीः ।
अनूनमग्निं पुरुधा सुश्वन्द्रं देवस्य मर्मजतश्चारु चक्षुः १६
एता ते अग्न उचथानि वेधो ऽवौचाम क्वये ता जुषस्व ।
उच्छौचस्व कृणुहि वस्यंसो नो महो रायः पुरुवार प्र यन्धि २०

(३) तृतीयं सूक्तम्

(१-१६) षोडशर्चस्यास्य सूक्तस्य गौतमो वामदेव ऋषिः । (१) प्रथमर्चोऽग्नी रुद्रो
वा (२-१६) द्वितीयादिपञ्चदशानाञ्चाग्निर्देवता । त्रिष्टुप् छन्दः

आ वो राजानमध्वरस्य रुद्रं होतारं सत्ययजं रोदस्योः ।
अग्निं पुरा तनयितोरचित्ता द्विरंशयरूपमवसे कृणुध्वम् १
अयं योनिश्चकृमा यं वयं ते जायेव पत्यं उशती सुवासाः ।
अर्वाचीनः परिवीतो नि षीदेमा उ ते स्वपाक प्रतीचीः २
आशृण्वते अट्टपिताय मन्म नृचक्षसे सुमृळीकार्य वेधः ।
देवार्यं शस्तिमृताय शंस ग्रावैव सोता मधुषुद् यमीळे ३
त्वं चिन्नः शम्या अग्ने अस्या ऋतस्य बोध्यृतचित् स्वाधीः ।
कदा त उक्था संधमाद्यानि कदा भवन्ति सख्या गृहे ते ४
कथा ह तद् वरुणाय त्वमग्ने कथा दिवे गर्हसे कन्न आगः ।
कथा मित्राय मीळ्हुषे पृथिव्यै ब्रवः कदर्यग्णे कद् भगाय ५
कद् धिष्यासु वृधसानो अग्ने कद् वाताय प्रतवसे शुभ्ये ।
परिज्मने नासत्याय क्षे ब्रवः कदग्ने रुद्राय नृग्ने ६
कथा महे पुष्टिभराय पूष्णे कद् रुद्राय सुमखाय हविर्दे ।
कद् विष्णव उरुगायाय रेतो ब्रवः कदग्ने शरवे बृहत्यै ७
कथा शर्धाय मरुतामृताय कथा सुरे बृहते पृच्छयमानः ।
प्रति ब्रवोऽदितये तुराय साधा दिवो जातवेदश्चिकित्वान् ८
ऋतेन ऋतं निर्यतमीळ आ गो रामा सचा मधुमत् पक्वमग्ने ।
कृष्णा सती रुशता धासिनैषा जामर्येण पर्यसा पीपाय ९
ऋतेन हि ष्मा वृषभश्चिदक्तः पुमाँ अग्निः पर्यसा पृष्ठयैन ।
अस्पन्दमानो अचरद् वयोधा वृषा शक्रं दुदुहे पृश्निरूधः १०
ऋतेनाद्रिं व्यसन् भिदन्तः समङ्गिरसौ नवन्त गोभिः ।
शुनं नरः परि षदनुषास माविः स्वरभवजाते अग्नौ ११

ऋतेन देवीरमृता अमृक्ता अर्णोभिरापो मधुमद्भिरग्रे ।
 वाजी न सर्गेषु प्रस्तुभानः प्र सदमित् स्रवितवे दधन्युः १२
 मा कस्य यक्षं सदमिद्धरो गा मा वेशस्य प्रमिनतो मापेः ।
 मा भ्रातुरग्रे अनृजोऽर्णं वेर्मा सख्युर्दक्षं रिपोर्भुजेम १३
 रक्षा णो अग्रे तव रक्षणेभी रारक्षाणः सुमख प्रीणानः ।
 प्रति ष्फुर वि रुज वीड्वंहौ जहि रक्षो महि चिद् वावृधानम् १४
 एभिर्भव सुमना अग्रे अर्के रिमान् त्स्पृश मन्मभिः शूर वाजान् ।
 उत ब्रह्माण्यङ्गिरो जुषस्व सं तै शस्तिर्देववाता जरेत १५
 एता विश्वा विदुषे तुभ्यं वेधो नीथान्यग्रे निशया वचांसि ।
 निवचना कवये काव्या न्यशांसिषं मतिभिर्विप्र उक्थैः १६

(४) चतुर्थं सूक्तम्

(१-१५) पञ्चदशर्चस्यास्य सूक्तस्य गौतमो वामदेव ऋषिः । रक्षोहाग्निर्देवता ।

त्रिष्टुप् छन्दः

कृणुष्व पाजः प्रसितिं न पृथ्वीं याहि राजेवामवाँ इभैन ।
 तृष्वीमनु प्रसितिं दूणानो ऽस्तांसि विध्यं रक्षसस्तपिष्ठैः १
 तव भ्रमास आशया पतन्त्यनु स्पृश धृषता शोशुचानः ।
 तपूष्यग्रे जुहा पतङ्गा नसदितो वि सृज विष्वगुल्काः २
 प्रति स्पशो वि सृज तूर्णितमो भवा पायुर्विशो अस्या अर्दब्धः ।
 यो नो दूरे अघशांसो यो अन्त्यग्रे मार्किष्टे व्यथिरा दधर्षीत् ३
 उदग्रे तिष्ठ प्रत्या तनुष्व न्यश्मित्राँ ओषतात् तिग्महेते ।
 यो नो अरातिं समिधान चक्रे नीचा तं धक्ष्यतसं न शुष्कम् ४
 ऊर्ध्वो भव प्रति विध्याध्यस्म दाविष्कृणुष्व दैव्यान्यग्रे ।
 अवं स्थिरा तनुहि यातुजूनां जामिमजामिं प्र मृणीहि शत्रून् ५
 स तै जानाति सुमतिं यविष्ठ य ईवते ब्रह्मणे गातुमैरत् ।
 विश्वान्यस्मै सुदिनानि रायो द्युमन्ययो वि दुरो अभि द्यौत् ६
 सेदग्रे अस्तु सुभर्गः सुदानु र्यस्त्वा नित्येन हविषा य उक्थैः ।
 पिप्रीषति स्व आयुषि दुरोगे विश्वेदस्मै सुदिना सासदिष्टिः ७
 अर्चामि ते सुमतिं घोष्यवाक् सं तै वावातां जरतामियं गीः ।
 स्वश्वास्त्वा सुरथा मर्जयेमा ऽस्मे क्षत्राणि धारयेरनु द्यून् ८

इह त्वा भूर्या चरेदुप त्मन् दोषावस्तर्दीदिवांसमनु घ्नन् ।
 क्रीळन्तस्त्वा सुमनसः सपेमा ऽभि द्युम्ना तस्थिवांसो जनानाम् ६
 यस्त्वा स्वश्वः सुहिरण्यो अग्र उपाति वसुमता रथेन ।
 तस्य त्राता भवसि तस्य सखा यस्त आतिथ्यमानुषग् जुजौषत् १०
 महो रुजामि बन्धुता वचोभि स्तन्मा पितुर्गोतमादन्वियाय ।
 त्वं नो अस्य वचसश्चिकिद्धि होतर्यविष्ठ सुक्रतो दमूनाः ११
 अस्वप्रजस्तरणयः सुशेवा अतन्द्रासो ऽवृका अश्रमिष्ठाः ।
 ते पायवः सध्वयञ्चो निषद्या ऽग्ने तव नः पान्त्वमूर १२
 ये पायवो मामतेयं ते अग्ने पश्यन्तो अन्धं दुरितादरक्षन् ।
 ररक्ष तान् त्सुकृतौ विश्ववेदा दिप्सन्त इद् रिपवो नाहं देभुः १३
 त्वया वयं सध्वन्यश्स्त्वोता स्तव प्रणीत्यश्याम् वाजान् ।
 उभा शंसा सूदय सत्यताते ऽनुष्ठया कृणुह्यहयाण १४
 अया ते अग्ने समिधा विधेम प्रति स्तोमं शस्यमानं गृभाय ।
 दहाशसो रक्षसः पाह्यश्स्मान् द्रुहो निदो मित्रमहो अवद्यात् १५

पञ्चमोऽध्यायः

व० १ । २६

(५) पञ्चमं सूक्तम्

(१-१५) पञ्चदशर्चस्यास्य सूक्तस्य गौतमो वामदेव ऋषिः । वैश्वानरोऽग्निर्देवता ।

त्रिष्टुप् छन्दः

वैश्वानराय मीळ्हुषे सजोषाः कथा दाशेमाग्रये बृहद् भाः ।
 अनूनेन बृहता वक्षथेनो प स्तभायदुपमिन्न रोधः १
 मा निन्दतु य इमां मह्यं रातिं देवो ददौ मर्त्याय स्वधावान् ।
 पाकाय गृत्सो अमृतो विचेता वैश्वानरो नृतमो युहो अग्निः २
 सामं द्विबर्हा महिं तिग्मभृष्टिः सहस्त्रेता वृषभस्तुविष्मान् ।
 पदं न गोरपगूळहं विविद्वा नग्निर्मह्यं प्रेदु वोचन्मनीषाम् ३
 प्र ताँ अग्निर्बभसत् तिग्मजम्भ स्तर्पिष्ठेन शोचिषा यः सुराधाः ।
 प्र ये मिनन्ति वरुणस्य धामं प्रिया मित्रस्य चेततो ध्रुवाणि ४
 अभ्रातरो न योषणो व्यन्तः पतिरिपो न जनयो दुरेवाः ।
 पापासः सन्तौ अनृता असत्या इदं पदमजनता गभीरम् ५

इदं मे अग्ने कियते पावका ऽमिनते गुरुं भारं न मन्म ।
 बृहद् दधाथ धृषता गभीरं यहं पृष्ठं प्रयसा सप्तधातु ६
 तमिन्वेइव समना समान मभि क्रत्वा पुनती धीतिरश्याः ।
 ससस्य चर्मन्नधि चारु पृश्ने रग्रे रूप आरुपितं जबारु ७
 प्रवाच्यं वचसः किं मे अस्य गुहा हितमुपे निशिग्वदन्ति ।
 यदुस्त्रियाणामप वारिव व्रन् पाति प्रियं रूपो अग्रं पदं वेः ८
 इदमु त्यन्महि महामनीकं यदुस्त्रिया सचत पूर्व्यं गौः ।
 ऋतस्य पदे अधि दीद्यानं गुहा रघुष्यद् रघुयद् विवेद ९
 अधं द्युतानः पित्रोः सचासा ऽमनुत गुह्यं चारु पृश्नैः ।
 मातुष्पदे परमे अन्ति षद् गो वर्ष्णाः शोचिषः प्रयतस्य जिह्वा १०
 ऋतं वौचे नमसा पृच्छयमानं स्तवाशसा जातवेदो यदीदम् ।
 त्वमस्य क्षयसि यद्ध विश्वं दिवि यदु द्रविणं यत् पृथिव्याम् ११
 किं नो अस्य द्रविणं कद्ध रत्नं वि नो वोचो जातवेदश्चिकित्वान् ।
 गुहाध्वनः परमं यन्नो अस्य रेकु पदं न निदाना अगन्म १२
 का मर्यादा वयुना कद्ध वाम मच्छा गमेम रघवो न वार्जम् ।
 कदा नो देवीरमृतस्य पत्नीः सूरौ वर्णेन ततननुषासः १३
 अनिरेण वचसा फल्वेन प्रतीत्येन कृधुनातृपासः ।
 अधा ते अग्ने किमिहा वद न्त्यनायुधास आसता सचन्ताम् १४
 अस्य श्रिये समिधानस्य वृष्णो वसोरनीकं दम् आ रुरोच ।
 रुशद् वसानः सुदृशीकरूपः क्षितिर्न राया पुरुवारो अद्यौत् १५

(६) षष्ठं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । अग्निर्देवता ।

त्रिष्टुप् छन्दः

ऊर्ध्व ऊ षु शौ अध्वरस्य होतु ग्रे तिष्ठ देवताता यजीयान् ।
 त्वं हि विश्वमभ्यसि मन्म प्र वेधसश्चित् तिरसि मनीषाम् १
 अमूरो होता न्यसादि विद्धवश् मिर्मन्द्रो विदथेषु प्रचैताः ।
 ऊर्ध्व भानुं सवितेवाश्रे न्मेतेव धूमं स्तभायदुप द्याम् २
 यता सुजूर्णी रातिनी घृताची प्रदक्षिणिद् देवतातिमुराणः ।
 उदु स्वरुर्नवजा नाक्रः पश्वो अनत्ति सुधितः सुमेकः ३

स्तीर्णे ब॒र्हिषि॑ समिधाने अ॒ग्रा ऊ॒र्ध्वो अ॒ध्व॒र्युर्जु॑जुषा॒णो अ॒स्थात् ।
पर्य॒ग्निः प॑शपा न होता॑ त्रिविष्ट॒येति॑ प्र॒दिव॑ उ॒राणः ४
परि॒ त्मना॑ मि॒तद्भू॑रेति॒ होता॑ ग्निर्म॒न्द्रो म॑धुवचा ऋ॒तावा॑ ।
द्रव॑न्त्यस्य वा॒जिनो॑ न शोका॒ भय॑न्ते विश्वा॒ भुव॑ना॒ यदभ्रा॑ट् ५
भ॒द्रा तै॑ अ॒ग्ने स्व॑नीक॒ संदृ॑ग् घोरस्य॒ सतो॑ विषु॒णस्य॑ चारुः ।
न यत् तै॑ शोचिस्तम॒सा वर॑न्त न ध्व॒स्मान॑स्तन्वी॒रे रेप॑ आ धुः ६
न यस्य॑ सातु॒र्जनितो॑रवारि॒ न मा॒तरा॑पितरा॒ नू चि॑दिष्टौ ।
अ॒धा मि॒त्रो न सु॑धितः पाव॒को॒रे॒ ऽग्नि॑दी॒दाय॑ मानु॒षीषु॑ वि॒क्षु ७
द्विर्य॑ पञ्च जी॒जनन् त्स॑वसा॒नाः स्व॑सारो अ॒ग्निं मानु॑षीषु वि॒क्षु ।
उ॒ष॒र्बुध॑मथ॒र्यो॒रे॒ न दन्त॑ श॒क्रं स्वा॑सं प॒रशु॑ न ति॒ग्मम् ८
तव॑ त्ये अ॒ग्ने ह॑रितौ घृ॒तस्त्रा॑ रोहि॒तास॑ ऋ॒ज्वञ्चः॑ स्वञ्चः ।
अ॒रु॒षासो॑ वृष॒ण ऋ॒जुमु॑ष्का आ दे॒वता॑तिमह॒न्त द॒स्माः ९
ये ह॑ त्ये ते स॒ह॒माना॑ अ॒यास॑ स्त्वेषा॒सौ अ॒ग्ने अ॒र्चय॑श्चर॒न्ति ।
श्ये॒नासो॑ न दु॒वस॑नासो अ॒र्थं तु॑विष्व॒णसो॑ मारु॒तं न श॑र्धः १०
अ॒कारि॑ ब्रह्म॒ समि॑धान॒ तुभ्यं॑ शंसा॒त्युक्थं॑ यज॒ते व्यू॑ धाः ।
होता॑रम॒ग्निं मनु॑षो॒ नि षै॑दु॒ नम॑स्यन्त॒ उ॒शिजः॑ शंस॒मायोः॑ ११

(७) सप्तमं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । अग्निर्देवता । (१)
प्रथमर्चो जगती (२-६) द्वितीयादिपञ्चानामनुष्टुप् (७-११) सप्तम्यादिपञ्चानाञ्च
त्रिष्टुप् छन्दांसि

अ॒यमि॑ह प्रथ॒मो धा॑यि धा॒तृभि॑र्हो॒ता यजि॑ष्ठो अ॒ध्वरे॑ष्वीड॒यः ।
यम॑प्र॒वानो॑ भृ॒गवो॑ विरु॒रुचु॑र्व॒नैषु॑ चि॒त्रं वि॒भ्वं वि॒शेवि॑शे १
अ॒ग्ने क॒दा तं॑ आ॒नुष॑ग् भुव॒द् दे॒वस्य॑ चे॒तन॑म् ।
अ॒धा हि॑ त्वा॒ जगृ॑धिरे म॒र्तासो॑ वि॒द्वीड॑यम् २
ऋ॒तावा॑नां॒ वि॒चैत॑सं पश्यन्तो॒ द्यामि॑व॒ स्तृभिः॑ ।
वि॒श्वेषा॑मध्व॒राणां॑ ह॒स्क॒र्तारं॑ द॒मैद॑मे ३
आ॒शुं दू॒तं वि॒वस्व॑तो॒ विश्वा॑ यश्च॒र्षणी॑र॒भि ।
आ॒ ज॒भ्रुः के॒तुमा॑यवो॒ भृ॒गवा॑णं वि॒शेवि॑शे ४
तमीं॑ होता॑रमानु॒षक् चि॑कि॒त्वांसं॑ नि षै॒दिरे॑ ।

रणं पावकशौचिषं यजिष्ठं सप्त धामभिः ५
 तं शश्वतीषु मातृषु वन आ वीतमश्रितम् ।
 चित्रं सन्तं गुहा हितं सुवेदं कूचिदर्थिनम् ६
 ससस्य यद् वियुता सस्मिन्नूर्ध्वं नृतस्य धामन् रणयन्त देवाः ।
 महाँ अग्निर्मसा रातहव्यो वेरध्वराय सदमिदृतावा ७
 वेरध्वरस्य दूत्यानि विद्वा नुभे अन्ता रोदसी संचिकित्वान् ।
 दूत ईयसे प्रदिव उरणो विदुष्टरो दिव आरोधनानि ८
 कृष्णं त एम् रुशतः पुरो भा अरिष्ठावर्चिर्वपुषामिदेकम् ।
 यदप्रवीता दधते ह गर्भं सद्यश्चिजातो भवसीदु दूतः ९
 सद्यो जातस्य ददृशानमोजो यदस्य वातो अनुवार्ति शोचिः ।
 वृणक्ति तिग्मामतसेषु जिह्वां स्थिरा चिदन्ना दयते वि जम्भैः १०
 तृषु यदन्ना तृषुणा ववक्ष तृषु दूतं कृणुते यहो अग्निः ।
 वार्तस्य मेळिं संचते निजूर्व न्नाशुं न वाजयते हिन्वे अर्वा ११

(८) अष्टमं सूक्तम्

(१-८) अष्टर्चस्यास्य सूक्तस्य गौतमो वामदेव ऋषिः । अग्निर्देवता ।

गायत्री छन्दः

दूतं वो विश्ववेदसं हव्यवाहममर्त्यम् । यजिष्ठमृञ्जसे गिरा १
 स हि वेदा वसुधितिं महाँ आरोधनं दिवः । स देवाँ एह वक्षति २
 स वेद देव आनमं देवाँ ऋतायते दमे । दाति प्रियाणि चिद् वसु ३
 स होता सेदु दूत्यं चिकित्वाँ अन्तरीयते । विद्वाँ आरोधनं दिवः ४
 ते स्याम ये अग्र्ये ददाशुर्हव्यदातिभिः । य ई पुष्यन्त इन्धते ५
 ते राया ते सुवीर्यैः ससवांसो वि शृणिवरे । ये अग्रा दधिरे दुर्वः ६
 अस्मे रायो दिवेदिवे सं चरन्तु पुरुस्पृहः । अस्मे वाजास ईरताम् ७
 स विप्रश्चर्षणीनां शर्वसा मानुषाणाम् । अतिं क्षिप्रेव विध्यति ८

(९) नवमं सूक्तम्

(१-९) अष्टर्चस्यास्य सूक्तस्य गौतमो वामदेव ऋषिः । अग्निर्देवता ।

गायत्री छन्दः

अग्रै मूळ महाँ असि य ईमा देवयुं जनम् । इयेथ बहिरासदम् १

स मानुषीषु दूळभौ विक्षु प्रावीरमर्त्यः । दूतो विश्वेषां भुवत् २
स सद्य परि गीयते होता मन्द्रो दिर्विष्टिषु । उत पोता नि षीदति ३
उत ग्रा अग्रिरध्वर उतो गृहपतिर्दमै । उत ब्रह्मा नि षीदति ४
वेषि ह्यध्वरीयता मुपवृक्ता जनानाम् । हव्या च मानुषाणाम् ५
वेषीदस्य दूत्यं यस्य जुजौषो अध्वरम् । हव्यं मर्तस्य वोळहवे ६
अस्माकं जोष्यध्वर मस्माकं यज्ञमद्भिरः । अस्माकं शृणुधी हवम् ७
परि ते दूळभो रथो ऽस्माँ अश्नोतु विश्वतः । येन रक्षसि दाशुषः ८

(१०) दशमं सूक्तम्

(१-८) अष्टर्चस्यास्य सूक्तस्य गौतमो वामदेव ऋषिः । अग्निर्देवता । (१-३)
प्रथमतृचस्य पदपङ्क्तिः (४, ६, ७) चतुर्थीषष्ठीसप्तमीनामृचां पदपङ्क्तिरुष्णिग्वा (५)
पञ्चम्या महापदपङ्क्तिः (८) अष्टम्याश्चोष्णिक् छन्दांसि
अग्ने तमद्या ऽश्वं न स्तोमैः क्रतुं न भद्रं हृदिस्पृशाम् । ऋध्यामां तु ओहैः १
अधा ह्यग्ने क्रतोर्भद्रस्य दक्षस्य साधोः । रथीर्ऋतस्य बृहतो बभूथ २
एभिर्नो अकैर्भवा नो अर्वाङ् स्वर्णं ज्योतिः । अग्ने विश्वैभिः सुमना
अनीकैः ३
आभिष्टै अद्य गीर्भिर्गृणन्तो ऽग्ने दाशैम । प्र ते दिवो न स्तनयन्ति शुष्माः ४
तव स्वादिष्टा ऽग्ने संदृष्टि रिदा चिदहं इदा चिदुक्तोः । श्रिये रुक्मो न रौचत
उपाके ५
घृतं न पूतं तनूररेपाः शुचि हिरण्यम् । तत् ते रुक्मो न रौचत स्वधावः ६
कृतं चिद्धि ष्मा सनेमि द्वेषो ऽग्रं इनोषि मतात् । इत्था यजमानादृतावः ७
शिवा नः सख्या सन्तु भ्रात्रा ऽग्रै देवेषु युष्मे । सा नो नाभिः सदर्ने
सस्मिन्नूर्धन् ८

द्वितीयोऽनुवाकः

सू० ११-२१

(११) एकादशं सूक्तम्

(१-६) षडृचस्यास्य सूक्तस्य गौतमो वामदेव ऋषिः । अग्निर्देवता । त्रिष्टुप् छन्दः
भद्रं ते अग्ने सहसिन्ननीकमुपाक आ रौचते सूर्यस्य ।
रुशद् दृशे ददृशे नक्तया चिदरूक्षितं दृश आ रूपे अन्नम् १

वि षाह्यग्ने गृणते मनीषां खं वेपसा तुविजातु स्तवानः ।
 विश्वैभिर्यद् वावनः शुक्र देवैस्तन्नौ रास्व सुमहो भूरि मन्म २
 त्वदग्ने काव्या त्वन्मनीषा स्त्वदुक्था जायन्ते राध्यानि ।
 त्वदैति द्रविणं वीरपेशा इत्थाधिये दाशुषे मर्त्याय ३
 त्वद् वाजी वाजंभरो विहाया अभिष्टिकृज्जायते सत्यशुष्मः ।
 त्वद् रयिर्देवजूतो मयो भुस्त्वदाशुर्जूजुवाँ अग्ने अर्वा ४
 त्वामग्ने प्रथमं देवयन्तौ देवं मर्ता अमृत मन्द्रजिह्वम् ।
 द्वेषोयुतमा विवासन्ति धीभिर्दमूनसं गृहपतिममूरम् ५
 आरे अस्मदमतिमारे अंह आरे विश्वाँ दुर्मतिं यन्निपासि ।
 दोषा शिवः संहसः सूनो अग्ने यं देव आ चित् सचसे स्वस्ति ६

(१२) द्वादशं सूक्तम्

(१-६) षड्चस्यास्य सूक्तस्य गौतमो वामदेव ऋषिः । अग्निर्देवता । त्रिष्टुप् छन्दः
 यस्त्वामग्ने इन्धते यतस्तुक् त्रिस्ते अन्नं कृणवत् सस्मिन्नहन् ।
 स सु द्युमैरभ्यस्तु प्रसन्नत् तव क्रत्वा जातवेदश्चिकित्वान् १
 इध्मं यस्ते जभरच्छ्रमाणो महो अग्ने अनीकमा संपर्यन् ।
 स इध्मानः प्रति दोषामुषासं पुष्यन् रयिं सचते घ्नन्नमित्रान् २
 अग्निरीशे बृहतः क्षत्रियस्याग्निर्वाजस्य परमस्य रायः ।
 दधाति रत्नं विधते यविष्ठो व्यानुषङ्गत्याय स्वधावान् ३
 यच्चिद्धि तै पुरुषत्रा यविष्ठाऽचित्तिभिश्चकृमा कच्चिदार्गः ।
 कृधी ष्वश्र्माँ अदितेरनागान् व्येनासि शिश्रथो विष्वगग्ने ४
 महश्चिदग्ने एनसो अभीक ऊर्वाद् देवानामुत मर्त्यानाम् ।
 मा ते सखायः सदमिद् रिषाम् यच्छा तोकाय तनयाय शं योः ५
 यथा ह त्यद् वसवो गौर्यं चित् पदि षिताममुञ्चता यजत्राः ।
 एवो ष्वश्र्मन्मुञ्चता व्यंहः प्र तार्यग्ने प्रतरं न आयुः ६

(१३) त्रयोदशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । अग्निर्लिङ्गोक्ता वा देवताः
 । त्रिष्टुप् छन्दः
 प्रत्यग्निरुषसामग्रमख्यद् विभातीनां सुमना रत्नधेयम् ।

यातमश्विना सुकृतौ दुरोणमुत् सूर्यो ज्योतिषा देव एति १
ऊर्ध्वं भानुं सविता देवो अश्रेद् द्रप्सं दर्विध्वद् गविषो न सत्वा ।
अनु वृतं वरुणो यन्ति मित्रो यत् सूर्यं दिव्यारोहयन्ति २
यं सीमकृणवन् तमसे विपृचै ध्रुवक्षेमा अनवस्यन्तो अर्थम् ।
तं सूर्यं हरितः सप्त यहीः स्पशं विश्वस्य जगतो वहन्ति ३
वहिष्ठेभिर्विहरन्यासि तन्तु मव्ययन्नसितं देव वस्म ।
दर्विध्वतो रश्मयः सूर्यस्य चर्मेवावाधुस्तमो अप्स्वशन्तः ४
अनायतो अनिबद्धः कथायं न्यङ्ङुत्तानोऽव पद्यते न ।
कया याति स्वधया को ददर्श दिव स्कम्भः समृतः पाति नाकम् ५

(१४) चतुर्दशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । अग्निर्लिङ्गोक्ता वा देवताः ।

त्रिष्टुप् छन्दः

प्रत्यग्निरुषसौ जातवेदा अख्यद् देवो रोचमाना महौभिः ।
आ नासत्योरुगाया रथेने मं यज्ञमुप नो यातमच्छ १
ऊर्ध्वं केतुं सविता देवो अश्रे ज्योतिर्विश्वस्मै भुवनाय कृणवन् ।
आप्रा द्यावापृथिवी अन्तरिक्षं वि सूर्यो रश्मिभिश्चेकितानः २
आवहन्त्यरुणीज्योतिषागा न्मही चित्रा रश्मिभिश्चेकिताना ।
प्रबोधयन्ती सुविताय देव्युष्णा ईयते सुयुजा रथेन ३
आ वां वहिष्ठा इह ते वहन्तु रथा अश्वास उषसो व्युष्टौ ।
इमे हि वां मधुपेयाय सोमा अस्मिन् यज्ञे वृषणा मादयेथाम् ४
अनायतो अनिबद्धः कथायं न्यङ्ङुत्तानोऽव पद्यते न ।
कया याति स्वधया को ददर्श दिवः स्कम्भः समृतः पाति नाकम् ५

(१५) पञ्चदशं सूक्तम्

(१-१०) दशर्चस्यास्य सूक्तस्य गौतमो वामदेव ऋषिः । (१-६)

प्रथमादिषड्चामग्निः (७-८) सप्तम्यष्टम्योः साहदेव्यः सोमकः (९-१०)

नवमीदशम्योश्चाश्विनौ देवताः । गायत्री छन्दः

अग्निर्होता नो अध्वरे वाजी सन् परिणीयते । देवो देवेषु यज्ञियः १
परि त्रिविष्टयध्वरं यात्यग्नी रथीरिव । आ देवेषु प्रयो दधत् २

परि वाजपतिः कवि रग्निर्हव्यान्यक्रमीत् । दधद् रत्नानि दाशुषे ३
 अयं यः सृञ्जये पुरो दैववाते समिध्यते । द्युमाँ अमित्रदम्भनः ४
 अस्यं घा वीर ईवतो ऽग्नेरीशीत मर्त्यः । तिग्मजम्भस्य मीळ्हुषः ५
 तमर्वन्तं न सानसि मरुषं न दिवः शिशुम् । मर्मृज्यन्ते दिवेदिवे ६
 बोधद्यन्मा हरिभ्यां कुमारः साहदेव्यः । अच्छा न हूत उदरम् ७
 उत त्या यजता हरी कुमारात् साहदेव्यात् । प्रयता सद्य आ ददे ८
 एष वा देवावश्विना कुमारः साहदेव्यः । दीर्घायुरस्तु सोमकः ९
 तं युवं दैवावश्विना कुमारं साहदेव्यम् । दीर्घायुषं कृणोतन १०

(१६) षोडशं सूक्तम्

(१-२१) एकविंशत्युचस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

आ सत्यो यातु मघवाँ ऋजीषी द्रवन्त्वस्य हरयु उपे नः ।
 तस्मा इदन्धः सुषुमा सुदक्ष मिहाभिपित्वं करते गृणानः १
 अर्वं स्य शूराध्वनो नान्ते ऽस्मिन् नो अद्य सर्वने मन्दध्यै ।
 शंसात्युक्थमुशनैव वेधा श्चिकितुषे असुर्याय मन्म २
 कविर्न निरयं विदथानि साधन् वृषा यत् सेकं विविपानो अर्चात् ।
 दिव इत्था जीजनत् सप्त कारू नह्नी चिच्चक्रुर्वयुना गृणन्तः ३
 स्वर्श्यद् वेदि सुदृशीकमर्के महि ज्योती रुरुचुर्यद्ध वस्तौः ।
 अन्धा तमासि दुधिता विचक्षे नृभ्यश्चकार नृत्तमो अभिष्टौ ४
 ववक्ष इन्द्रो अमितमृजी ष्युश्वे आ पप्रौ रोदसी महित्वा ।
 अतश्चिदस्य महिमा वि रे च्यभि यो विश्वा भुवना बभूव ५
 विश्वानि शक्रो नर्याणि विद्वा नपो रिरिच सखिभिर्निकामैः ।
 अश्मानं चिद् ये बिभिदुर्वचौभि र्वजं गोमन्तमुशिजो वि ववुः ६
 अपो वृत्रं वव्रिवांसं पराहन् प्रावत् ते वज्रं पृथिवी सचेताः ।
 प्राणांसि समुद्रियाण्यैनोः पतिर्भवञ्छवसा शूर धृष्णो ७
 अपो यदद्रि पुरुहूत दद राविर्भुवत् सरमा पूर्वं ते ।
 स नो नेता वाजमा दर्षि भूरि गोत्रा रुजन्नङ्गिरोभिर्गृणानः ८
 अच्छा कविं नृमणो गा अभिष्टौ स्वर्षाता मघवन्नाधमानम् ।
 ऊतिभिस्तमिषणो द्युम्रहृतौ नि मायावानब्रह्मा दस्युरर्त ९

आ दस्युघ्ना मनसा याह्यस्तं भुवत् ते कुत्सः सख्ये निकामः ।
 स्वे योनौ नि षदत् सरूपा वि वां चिकित्सदृत्चिद्ध नारी १०
 यासि कुत्सेन सरथमवस्यु स्तोदो वार्तस्य हर्योरीशानः ।
 ऋजा वाजं न गध्यं युयूषन् कविर्यदहन् पार्याय भूषात् ११
 कुत्साय शुष्णामशुषं नि बर्हीः प्रपित्वे अहः कुर्यवं सहस्रा ।
 सद्यो दस्युन् प्र मृण कुत्स्येन प्र सूरश्चक्रं वृहतादभीके १२
 त्वं इंपुं मृगयं शूशुवांसं मृजिश्चने वैदधिनाय रन्धीः ।
 पञ्चाशत् कृष्णा नि वपः सहस्रा ऽत्कं न पुरौ जरिमा वि दंदः १३
 सूरं उपाके तन्वंश् दधानो वि यत् ते चेत्यमृतस्य वर्षः ।
 मृगो न हृस्ती तविषीमुषाणः सिंहो न भीम आयुधानि बिभ्रत् १४
 इन्द्रं कामा वसूयन्तौ अग्नन् त्स्वर्मीळहे न सर्वने चकानाः ।
 श्रवस्यवः शशमानासं उक्थै रोको न रगवा सुदृशीव पुष्टिः १५
 तमिद् व इन्द्रं सुहवं हुवेम यस्ता चकार नर्या पुरूणि ।
 यो मावते जरित्रे गध्यं चि न्मन्नु वाजं भरति स्पार्हराधाः १६
 तिग्मा यदन्तरशनिः पताति कस्मिञ्चिच्छूर मुहुके जनानाम् ।
 घोरा यदर्यं समृतिर्भवा त्यधं स्मा नस्तन्वो बोधि गोपाः १७
 भुवोऽविता वामदेवस्य धीनां भुवः सखावृको वाजसातौ ।
 त्वामनु प्रमतिमा जगन्मो रुशंसौ जरित्रे विश्वधं स्याः १८
 एभिर्नृभिरिन्द्र त्वायुभिष्ठा मघवद्भिर्मघवन् विश्व आजौ ।
 द्यावो न द्युमैरभि सन्तौ अर्यः क्षपो मदेम शरदश्च पूर्वीः १९
 एवेदिन्द्राय वृषभाय वृष्णे ब्रह्माकर्म भृगवो न रथम् ।
 नू चिद् यथा नः सख्या वियोषदसन्न उग्रोऽविता तनूपाः २०
 नू ष्टुत इन्द्र नू गृणान इषं जरित्रे नद्योऽं न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः २१

(१७) सप्तदशं सूक्तम्

(१-२१) एकविंशत्यृचस्यास्य सूक्तस्य गौतमो वामदेव ऋषिः । इन्द्रो देवता ।

(१-१४, १६-२१) प्रथमादिचतुर्दशर्चा षोडश्यादिषण्णाञ्च त्रिष्टुप् (१५)

पञ्चदश्याश्चैकपदा विराट् छन्दसी

त्वं म॒हाँ इन्द्र॑ तुभ्य॑ ह॒ द्वा अ॒नुं द्वा॒त्रं म॒हना॑ मन्यत॒ द्यौः ।
 त्वं वृ॒त्रं शर्व॑सा जघ॒न्वान् त्सृ॑जः सि॒न्धूर॑हि॒ना ज॒ग्रसानान् १
 तव॑ त्वि॒षो ज॒निमन् रे॒जत् द्यौ रे॒जद् भूमि॑र्भियसा स्वस्य॑ म॒न्योः ।
 ऋ॒घाय॑न्त॒ सुभ्व॑ः पर्व॒तास॑ आ॒र्दन् ध॒न्वानि॑ स॒रय॑न्त॒ आपः २
 भि॒नद् गि॒रिं शर्व॑सा व॒ज्रमि॑ष्णा॒न्नावि॑ष्कृ॒णवानः॑ स॒हसान॑ ओ॒जः ।
 व॒धीद् वृ॒त्रं व॒ज्रेण॑ म॒न्दसानः॑ स॒र॒न्नापो॑ जर्वसा ह॒तवृ॑ष्णीः ३
 सु॒वीर॑स्ते ज॒निता॑ म॒न्यत् द्यौ रि॒न्द्रस्य॑ क॒र्ता स्व॑प॒स्तमो॑ भूत् ।
 य इ॑ ज॒जान॑ स्व॒र्यं सु॒वज्र॑ म॒नप॑च्युतं स॒दसो॑ न भूमं ४
 य एक॑ इ॒च्चया॑व॒र्यति॑ प्र भू॒मा राजा॑ कृ॒ष्टीनां॑ पु॒रुहू॑त इन्द्रः ।
 स॒त्यमै॑न॒मनु॑ विश्वे॑ म॒दन्ति॑ रा॒तिं दे॒वस्य॑ गृ॒णतो॑ म॒घोनः॑ ५
 स॒त्रा सो॒मा अ॒भवन्न॑स्य विश्वे॑ स॒त्रा म॒दासो॑ बृ॒हतो॑ म॒दिष्ठाः ।
 स॒त्राभ॑वो व॒सुप॑तिर्व॒सूनां॑ द॒त्रे विश्वा॑ अधि॒था इन्द्र॑ कृ॒ष्टीः ६
 त्वम॑धं प्रथ॒मं जा॑र्य॒मानो॑ ऽमे॒ विश्वा॑ अधि॒था इन्द्र॑ कृ॒ष्टीः ।
 त्वं प्रति॑ प्र॒वत॑ आ॒शया॑न्महिं व॒ज्रेण॑ म॒घव॑न् वि॒वृश्चः॑ ७
 स॒त्राह॑णं दा॒धृषिं॑ तु॒म्रमि॑न्द्रं म॒हाम॑पा॒रं वृ॑ष॒भं सु॒वज्र॑म् ।
 ह॒न्ता यो॑ वृ॒त्रं स॒नि॒तो॒त वा॒जं दा॒ता म॒घानि॑ म॒घवा॑ सुरा॒धाः ८
 अ॒यं वृ॑त॒श्चा॒तय॑ते स॒मीची॑ र्य॒ आजि॑षु म॒घवा॑ शृ॒णव॑ एकः ।
 अ॒यं वा॒जं भ॑रति॒ यं स॒नोत्य॑स्य प्रि॒यासः॑ स॒ख्ये स्या॑म ९
 अ॒यं शृ॑ण॒वे अ॒ध॒ ज॑र्य॒न्नत॑ घ्न॒न्नय॑मु॒त प्र॑ कृ॒णु॑ते यु॒धा गाः ।
 य॒दा स॒त्यं कृ॑णु॒ते म॒न्युमि॑न्द्रो विश्वे॑ दृ॒ळहं॑ भ॒यत् ए॒जद॑स्मात् १०
 स॒मिन्द्रो॑ गा अ॒जय॑त् सं॒ हिर॑ण॒या स॒मश्चि॑या म॒घवा॑ यो ह॑ पु॒र्वीः ।
 ए॒भिर्नृ॑भिर्नृ॒तमो॑ अस्य शा॒कै रा॒यो वि॑भ॒क्ता स॑भ॒रश्च॑ व॒स्वः ११
 कि॒र्यत् स्वि॑दिन्द्रो अ॒र्ध्वैति॑ मा॒तुः कि॒र्यत् पि॒तुर्ज॑नि॒तुर्यो॑ ज॒जान॑ ।
 यो अ॒स्य शु॑ष्मं मु॒हुकै॑रि॒र्यति॑ वा॒तो न॑ जू॒तः स्त॒नय॑द्भि॒रभ्रैः १२
 क्षि॒यन्त॑ त्व॒मक्षि॑यन्तं कृ॒णोती॑ र्य॒ति रे॒णुं म॒घवा॑ स॒मोह॑म् ।
 वि॒भ॒ञ्जन॑र॒शनि॑माँ इ॒व द्यौ रू॒त स्तो॑तारं म॒घवा॑ व॒सौ धा॑त् १३
 अ॒यं च॒क्रमि॑षण॒त् सूर्य॑स्य॒ न्येत॑शं री॒रम॑त् स॒सृमा॑णम् ।
 आ कृ॑ष्ण इ॑ जु॒हुरा॑णो जि॒घर्ति॑ त्व॒चो बु॒धे र॒जसो॑ अ॒स्य यो॒नौ १४
 अ॒सि॒क्यां य॑ज॒मानो॑ न होता १५
 ग॒व्यन्त॑ इन्द्रं स॒ख्याय॑ वि॒प्रा अ॒श्वाय॑न्तो वृ॒षणं॑ वा॒जय॑न्तः ।

जनीयन्तौ जनिदामक्षितोति मा च्यावयामोऽवृते न कोशम् १६
 त्राता नो बोधि ददृशान आपि रभिख्याता मर्दिता सोम्यानाम् ।
 सर्वा पिता पितृतमः पितृणां कर्तुमु लोकमुशते वयोधाः १७
 सखीयतामविता बोधि सर्वा गृणान इन्द्र स्तुवृते वयो धाः ।
 वयं ह्या तै चकृमा सबाध आभिः शमीभिर्महयन्त इन्द्र १८
 स्तुत इन्द्रो मघवा यद्ध वृत्रा भूरीण्येको अप्रतीनि हन्ति ।
 अस्य प्रियो जरिता यस्य शर्म न्नकिर्देवा वारयन्ते न मर्ताः १९
 एवा न इन्द्रो मघवा विरप्शी करत् सत्या चर्षणीधृदनुवा ।
 त्वं राजा जनुषां धेह्यस्मे अधि श्रवो माहिनं यज्ररित्रे २०
 नू ष्टुत इन्द्र नू गृणान इषं जरित्रे नद्योऽं न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः २१

(१८) अष्टादशं सूक्तम्

(१-१३) त्रयोदशर्चस्यास्य सूक्तस्य (१) प्रथमर्च इन्द्रः (२-३, ४, ८-१३)
 द्वितीयातृतीययोश्चतुर्थ्याः पूर्वार्धस्याष्टम्यादिषण्णाञ्च गौतमो वामदेव ऋषी (४, ५-
 ७) चतुर्थ्या उत्तरार्धस्य पञ्चम्यादितृचस्य चादितिर्ऋषिका । (१, ४, ५-७)
 प्रथमर्चश्चतुर्थ्या उत्तरार्धस्य पञ्चम्यादितृचस्य च वामदेवः (२-३, ४, ८-१३)
 द्वितीयातृतीययोश्चतुर्थ्याः पूर्वार्धस्याष्टम्यादिषण्णाञ्चेन्द्रो देवते । त्रिष्टुप् छन्दः
 अयं पन्था अनुवित्तः पुराणो यतो देवा उदजायन्त विश्वे ।
 अतश्चिदा जनिषीष्ट प्रवृद्धो मा मातरममुया पत्तवे कः १
 नाहमतो निरया दुर्गहितत् तिरश्चता पार्श्वान्निर्गमाणि ।
 बहूनि मे अकृता कर्त्वानि युध्यै त्वेन सं त्वेन पृच्छै २
 पुरायतीं मातरमन्वचष्ट न नानु गान्यनु नू गमानि ।
 त्वष्टुर्गृहे अपिबत् सोमिन्द्रः शतधन्यं चम्बोः सुतस्य ३
 किं स ऋधक कृणवद् यं सहस्रं मासो जभारं शरदश्च पूर्वीः ।
 नही न्वस्य प्रतिमानमस्त्य न्तजतिषूत ये जनित्वाः ४
 अवद्यमिव मन्यमाना गुहाक रिन्द्रं माता वीर्येणा न्यृष्टम् ।
 अथोदस्थात् स्वयमत्कं वसानु आ रोदसी अपृणाज्जायमानः ५
 एता अर्षन्त्यललाभवन्ती ऋतावरीरिव संक्रोशमानाः ।
 एता वि पृच्छ किमिदं भनन्ति कमापो अद्रिं परिधिं रुजन्ति ६

किमुं श्विदस्मै निविदौ भनन्ते न्द्रस्यावृद्धं दिधिषन्त आपः ।
 ममैतान् पुत्रो महता वृधेन वृत्रं जघन्वाँ असृजद् वि सिन्धून् ७
 ममञ्चन त्वा युवतिः पुरासु ममञ्चन त्वा कुषवा जगारं ।
 ममञ्चिदापुः शिशवे ममृड्युर्ममञ्चिदिन्द्रः सहसोदतिष्ठत् ८
 ममञ्चन ते मघवन् व्यसो निविविध्वाँ अप हनू जघानं ।
 अधा निविद्ध उत्तरो बभूवा ञ्छिरौ दासस्य सं इंपणग्वधेन ९
 गृष्टिः संसूव स्थविरं तवागा मनाधृष्यं वृषभं तुम्रमिन्द्रम् ।
 अरीळहं वृत्सं चरथाय माता स्वयं गातुं तन्व इच्छमानम् १०
 उत माता महिषमन्ववेन दमी त्वा जहति पुत्र देवाः ।
 अथाब्रवीद् वृत्रमिन्द्रो हनिष्यन् त्सखै विष्णो वितरं वि क्रमस्व ११
 कस्तै मातरं विधवामचक्र छयुं कस्त्वामजिघांसञ्चरन्तम् ।
 कस्तै देवो अधि मारुडि क आसीद् यत् प्राक्षिणाः पितरं पाद्गृह्य १२
 अवर्त्या शुनं आन्त्राणि पेचे न देवेषु विविदे मर्डितारम् ।
 अपश्यं जायाममहीयमाना मधा मे श्येनो मध्वा जभार १३

षष्ठोऽध्यायः

व० १-३०

(१६) एकोनविंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

एवा त्वामिन्द्र वज्रिन्नत्र विश्वे देवासः सुहवास ऊमाः ।
 महामुभे रोदसी वृद्धमृष्वं निरेकमिद् वृणते वृत्रहत्यै १
 अवासृजन्त जिव्रयो न देवा भुवः सम्राळिन्द्र सत्ययौनिः ।
 अहन्नहिं परिशयान्मर्णः प्र वर्तनीररदो विश्वधेनाः २
 अतृपणवन्तं विर्यतमबुध्यमबुध्यमानं सुषुपाणमिन्द्र ।
 सप्त प्रति प्रवत आशयान् महिं वज्रेण वि रिणा अपर्वन् ३
 अक्षौदयच्छर्वसा क्षाम बुध्नं वारुणं वातस्तविषीभिरिन्द्रः ।
 दृळहान्यौभ्नादुशमान् ओजो ऽवाभिनत् ककुभः पर्वतानाम् ४
 अभि प्र दद्दुर्जनेयो न गर्भं रथा इव प्र ययुः साकमद्रयः ।
 अतर्पयो विसृत उब्ज ऊर्मीन् त्वं वृताँ अरिणा इन्द्र सिन्धून् ५

त्वं म॒हीम॒वनिं॑ वि॒श्वधे॑नां तु॒र्वीत॑ये व॒य्याय॑ चर॒न्तीम् ।
 अ॒रम॑यो नम॒सैज॒दर्णः॑ सु॒तर॑णाँ अ॒कृणो॑रिन्द्र॒ सिन्धू॑न् ६
 प्रा॒गुवो॑ नभ॒न्वो॑र्इ न वक्वा॑ ध्व॒स्त्रा अ॑पि॒न्वद् यु॒वती॑र्त्त॒ज्ञाः ।
 धन्वा॒न्यज्राँ॑ अ॒पृणक्॑ तृषा॒णाँ अ॒धोगि॑न्द्रः स्त॒र्यो॑र्इ दं॒सुप॑तीः ७
 पूर्वी॒रुष॑सः श॒रद॑श्च गू॒र्ता वृ॒त्रं ज॑घ॒न्वाँ अ॒सृज॑द् वि सिन्धू॑न् ।
 परि॑ष्ठिता अ॒तृण॑द् ब॒द्धा॒नाः सी॒रा इन्द्रः॑ स्रवि॒तवे॑ पृथि॒व्या ८
 व॒ग्नीभिः॑ पु॒त्रम॒गुवो॑ अ॒दानं॑ नि॒वेश॑नाद्धरि॒व आ ज॑भर्थ ।
 व्य॑श्न्धो अ॒रुव॑दहि॒माद॑दानो नि॒र्भूदु॑खच्छि॒त् सम॑रन्त॒ पर्व ९
 प्र ते॑ पूर्वा॒णि कर॑णानि वि॒प्रा ऽऽवि॑द्वाँ आ॒ह वि॒दुषे॑ करा॒सि ।
 यथा॑यथा वृ॒ष्यानि॑ स्वगू॒र्ता ऽपा॑सि रा॒जन् न॑र्या॒विवे॑षीः १०
 नू ष्ट॑ इन्द्र॒ नू गृ॑णान॒ इषे॑ ज॒रित्रे॑ न॒द्यो॑र्इ न पी॒पेः ।
 अ॒कारि॑ ते हरि॒वो ब्र॒ह्म न॑व्य॒ धिया॑ स्या॒म र॒थ्यः सदा॑साः ११

(२०) विंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

आ न॒ इन्द्रो॑ दू॒रादा॑ न आ॒सा द॑भिष्टि॒कृद॑वसे यासदु॒ग्रः ।
 ओ॒जिष्ठे॑भिर्नृ॒पति॑र्व॒ज्रबा॑हुः सं॒गे स॒मत्सु॑ तु॒र्वणिः॑ पृ॒तन्यू॑न् १
 आ न॒ इन्द्रो॑ हरि॒भिर्या॑त्वच्छा॒ ऽर्वा॒चीनो॑ऽवसे रा॒धसे॑ च ।
 ति॒ष्ठाति॑ व॒ज्री म॒घवा॑ वि॒रप॑शी मं॒ यज्ञ॑मनु॒ नो वा॑जसा॒तौ २
 इ॒मं य॒ज्ञं त्व॑म॒स्माक॑मिन्द्र॒ पुरो॑ दधत् स॒निष्य॑सि॒ क्रतु॑ नः ।
 श्व॒घ्नीव॑ व॒ज्रिन् त्स॑नये॒ धर्ना॑नां त्वया॑ व॒यम॑र्य आ॒जिं ज॑येम ३
 उ॒शन्नु॑ षु॒ णः॑ सु॒मना॑ उ॒पाके॑ सोम॒स्य नु॑ सु॒षुत॑स्य स्वधावः ।
 पा इन्द्र॑ प्र॒तिभू॑तस्य॒ मध्वः॑ स॒मन्ध॑सा म॒मदः॑ पृ॒ष्ठये॑न ४
 वि यो र॑र॒पश॑ ऋ॒षिभि॑र्नवै॒भिर्वृ॑द्धो न प॒क्वः सृ॑णयो॒ न जे॑ता ।
 म॒र्यो न यो॑षाम॒भि म॑न्य॒मानो॑ ऽच्छा॒ विव॑क्मि॒ पुरु॑हू॒तमिन्द्र॑म् ५
 गि॒रिर्न यः॑ स्व॒तवाँ॑ ऋ॒ष्व इन्द्रः॑ स॒नादे॑व स॒हसे॑ जा॒त उ॒ग्रः ।
 आ॒द॒र्ता व॒ज्रं स्थ॑वि॒रं न भी॑म उ॒दने॑व॒ कोशं॑ व॒सुना॑ न्यृष्टम् ६
 न य॑स्य॒ वर्ता॑ ज॒नुषा॑ न्वस्ति॒ न रा॑धस॒ आम॑री॒ता म॒घस्य॑ ।
 उ॒द्वावृ॑षा॒णस्त॑विषी॒व उ॒ग्रा स्म॑भ्य॒ दद्धि॑ पुरु॒हूत॑ रा॒यः ७

ईक्षे रायः क्षयस्य चर्षणीना मुत वृजमपवर्तासि गोनाम् ।
 शिञ्जानरः समिथेषु प्रहावान् वस्वो राशिमभिनेतासि भूरिम् ८
 कया तच्छृणवे शच्या शचिष्ठो यया कृणोति मुहु का चिदृष्वः ।
 पुरु दाशुषे विचयिष्ठो अंहो ऽथा दधाति द्रविणं जरित्रे ९
 मा नो मर्धीरा भरा दद्धि तन्नः प्र दाशुषे दातवे भूरि यत् तै ।
 नव्ये देष्णो शस्ते अस्मिन् त उक्थे प्र ब्रवाम वयमिन्द्र स्तुवन्तः १०
 नू षुत इन्द्र नू गृणान इषं जरित्रे नद्योऽं न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ११

(२१) एकविंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

आ यात्विन्द्रोऽवस उप न इह स्तुतः संधमादस्तु शूरः ।
 वावृधानस्तविषीर्यस्य पूर्वा द्यौर्न क्षत्रमभिभूति पुष्यात् १
 तस्येदिह स्तवथ वृषयानि तुविद्युमस्य तुविरार्धसो नृन् ।
 यस्य क्रतुर्विदथ्योऽं न सम्राट् साहान् तरुत्रो अभ्यस्ति कृष्टीः २
 आ यात्विन्द्रो दिव आ पृथिव्या मक्षू समुद्रादुत वा पुरीषात् ।
 स्वर्णरादवसे नो मरुत्वान् परावतो वा सदनादृतस्य ३
 स्थूरस्य रायो बृहतो य ईशे तमु ष्टवाम विदथेष्विन्द्रम् ।
 यो वायुना जयति गोमतीषु प्र धृष्णुया नयति वस्यो अच्छ ४
 उप यो नमो नमसि स्तभाय त्रियति वाचं जनयन् यज्ज्यै ।
 अञ्जसानः पुरुवार उक्थे रेन्द्रं कृणवीत् सदनेषु होता ५
 धिषा यदि धिषण्यन्तः सरणयान् त्सदन्तो अद्रिमौशिजस्य गोहे ।
 आ दुरोषाः पास्त्यस्य होता यो नो महान् त्संवरणेषु वह्निः ६
 सत्रा यदी भार्वरस्य वृष्णः सिषक्ति शुष्मः स्तुवते भाराय ।
 गुहा यदीमौशिजस्य गोहे प्र यद् धिये प्रायसे मदाय ७
 वि यद् वरांसि पर्वतस्य वृणवे पर्योभिर्जिन्वे अपां जवांसि ।
 विदद् गौरस्य गव्यस्य गोहे यदी वाजाय सुध्योऽं वहन्ति ८
 भद्रा ते हस्ता सुकृतोत पाणी प्रयन्तारां स्तुवते रार्ध इन्द्र ।
 का ते निषक्तिः किमु नो ममत्सि किं नोदुदु हर्षसे दातवा उ ९

एवा वस्व इन्द्रः सत्यः सप्ता इन्ता वृत्रं वरिवः पूरवे कः ।
 पुरुष्टुत क्रत्वा नः शग्धि रायो भन्नीय तेऽवसो दैव्यस्य १०
 नू ष्टुत इन्द्र नू गृणान इषं जरित्रे नद्योऽं न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ११
 तृतीयोऽनुवाकः
 व० २२-३२

(२२) द्वाविंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

यन्न इन्द्रो जुजुषे यच्च वष्टि तन्नो महान् करति शष्प्या चित् ।
 ब्रह्म स्तोमं मघवा सोममुक्था यो अश्मानं शर्वसा बिभ्रदेति १
 वृषा वृषन्धिं चतुरश्रिमस्यं नृगो बाहुभ्यां नृतमः शचीवान् ।
 श्रिये परुष्णीमुषमाण ऊर्णा यस्याः पर्वाणि सख्याय विव्ये २
 यो देवो देवर्तमो जायमानो महो वाजैभिर्महद्भिश्च शुष्मैः ।
 दधानो वज्रं बाहोरुशन्तं द्याममेन रेजयत् प्र भूर्म ३
 विश्वा रोधांसि प्रवतश्च पूर्वी द्यौर्ऋष्वाञ्जनिमन् रेजत द्वाः ।
 आ मातरा भरति शष्प्या गो नृवत् परिज्मन् नोनुवन्त वाताः ४
 ता तू त इन्द्र महतो महानि विश्वेष्वित् सर्वनेषु प्रवाच्या ।
 यच्छूर धृष्णो धृषता दधृष्वा नहिं वज्रेण शवसाविवेषीः ५
 ता तू तै सत्या तुविनृम्ण विश्वा प्र धेनवः सिस्रते वृष्ण ऊर्ध्वः ।
 अधा ह त्वद् वृषमणो भियानाः प्र सिन्धवो जर्वसा चक्रमन्त ६
 अत्राहं ते हरिवस्ता उ देवी रवोभिरिन्द्र स्तवन्त स्वसारः ।
 यत् सीमनु प्र मुचो बद्धधाना दीर्घामनु प्रसितिं स्यन्द्यध्यै ७
 पिपीळे अंशुर्मद्यो न सिन्धु रा त्वा शर्मा शशमानस्यं शक्तिः ।
 अस्मद्रयक शुशुचानस्यं यम्या आशुर्न रश्मिं तुव्योर्जसं गोः ८
 अस्मे वर्षिष्ठा कृणुहि ज्येष्ठां नृम्णानि सत्रा सहरे सहांसि ।
 अस्मभ्यं वृत्रा सुहनानि रन्धि जहि वर्धर्वनुषो मर्त्यस्य ९
 अस्माकमित् सु शृणुहि त्वमिन्द्राऽस्मभ्यं चित्राँ उप माहि वाजान् ।
 अस्मभ्यं विश्वा इषणः पुरंधी रस्माकं सु मघवन् बोधि गोदाः १०

नू ष्टुत इन्द्र नू गृणान इषं जरित्रे नद्योर् न पीपेः ।
अकारि ते हरिवो ब्रह्म नव्यं धिया स्याम रथ्यः सदासाः ११

(२३) त्रयोविंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । (१-७, ११)
प्रथमादिसप्तर्चामिकादश्याश्चेन्द्रः (८-१०) अष्टम्यादितृचस्येन्द्र ऋतं वा देवता ।

त्रिष्टुप् छन्दः

कथा महामवृधत् कस्य होतु र्यज्ञं जुषाणो अभि सोममूर्धः ।
पिबन्नुशानो जुषमाणो अन्धौ ववृक्ष ऋष्वः शुचते धनाय १
को अस्य वीरः संघमादमापु समानंश सुमतिभिः को अस्य ।
कदस्य चित्रं चिकित्ते कदूती वृधे भुवच्छशमानस्य यज्योः २
कथा शृणोति हूयमानमिन्द्रः कथा शृणवन्नवसामस्य वेद ।
का अस्य पूर्वीरुपमातयो ह कथैनमाहुः पपुंरिं जरित्रे ३
कथा सबाधः शशमानो अस्य नशदभि द्रविणं दीध्यानः ।
देवो भुवन्नवेदा म ऋतानां नमो जगृभ्वाँ अभि यज्जुजौषत् ४
कथा कदस्या उषसो व्युष्टौ देवो मर्तस्य सख्यं जुजोष ।
कथा कदस्य सख्यं सखिभ्यो ये अस्मिन् कामं सुयुजं ततस्त्रे ५
किमादमंत्रं सख्यं सखिभ्यः कदा नु तै भ्रात्रं प्र ब्रवाम ।
श्रिये सुदृशो वपुंरस्य सर्गाः स्वर्णं चित्रतममिषु आ गोः ६
द्रुहं जिघांसन् ध्वरसमनिन्द्रां तेतिक्ते तिग्मा तुजसे अनीका ।
ऋणा चिद् यत्र ऋणया न उग्रो दूरे अज्ञाता उषसौ बबाधे ७
ऋतस्य हि शरुधः सन्ति पूर्वी ऋतस्य धीतिर्वृजिनानि हन्ति ।
ऋतस्य श्लोको बधिरा ततर्द कर्णा बुधानः शचमान आयोः ८
ऋतस्य दृळहा धरुणानि सन्ति पुरुणि चन्द्रा वपुषे वपुषि ।
ऋतेन दीर्घमिषणन्त पृक्षं ऋतेन गावं ऋतमा विवेशुः ९
ऋतं येमान ऋतमिद् वनोत्यृ तस्य शुष्मस्तुरया उ गव्युः ।
ऋताय पृथ्वी बहुले गभीरे ऋताय धेनू परमे दुहाते १०
नू ष्टुत इन्द्र नू गृणान इषं जरित्रे नद्योर् न पीपेः ।
अकारि ते हरिवो ब्रह्म नव्यं धिया स्याम रथ्यः सदासाः ११

(२४) चतुर्विंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रो देवता । (१-
६, ११) प्रथमादिनवर्चामेकादश्याश्च त्रिष्टुप् (१०) दशम्याश्चानुष्टुप् छन्दसी
का सुष्टुतिः शर्वसः सूनुमिन्द्रं मर्वाचीनं राधसु आ ववर्तत् ।
दुदिर्हि वीरो गृणते वसूनि स गोपतिर्निष्पिधां नो जनासः १
स वृत्रहत्ये हव्यः स ईड्यः स सुष्टुत इन्द्रः सत्यराधाः ।
स यामन्ना मघवा मर्त्याय ब्रह्मण्यते सुष्वये वरिवो धात् २
तमिन्नरो वि ह्वयन्ते समीके रिरिक्वांसस्तन्वः कृणवत् त्राम् ।
मिथो यत् त्यागमुभयासो अगमन् नरस्तोकस्य तनयस्य सातौ ३
क्रतूयन्ति क्षितयो योग उग्रा ऽऽशुषाणासौ मिथो अणसातौ ।
सं यद् विशोऽववृत्रन्त युध्मा आदिन्नेम इन्द्रयन्ते अभीके ४
आदिद्ध नेम इन्द्रियं यजन्त आदित् पक्तिः पुरोळाशं रिरिच्यात् ।
आदित् सोमो वि पपृच्यादसुष्वी नादिङ्गुजोष वृषभं यजध्वै ५
कृणोत्यस्मै वरिवो य इत्थेन्द्राय सोममुशते सुनोति ।
सध्वीचीनेन मनसाविवेनन् तमित् सखायं कृणुते समत्सु ६
य इन्द्राय सुनवत् सोममद्य पचात् पत्कीरुत भृञ्जाति धानाः ।
प्रति मनायोरुचथानि हर्यन् तस्मिन् दधद् वृषणं शुष्मिन्द्रः ७
यदा समर्य व्यचेदृघावा दीर्घं यदाजिमभ्यख्यदर्यः ।
अचिक्रदद् वृषणं पत्रयच्छा दुरोण आ निशितं सोमसुद्धिः ८
भूर्यसा वस्त्रमचरत् कनीयो ऽविक्रीतो अकानिषं पुनर्यन् ।
स भूर्यसा कनीयो नारिरीचीद् दीना दक्षा वि दुहन्ति प्र वाणम् ९
क इमं दशभिर्ममेन्द्रं क्रीणाति धेनुभिः ।
यदा वृत्राणि जङ्घन् दथैनं मे पुनर्ददत् १०
नू ष्टुत इन्द्र नू गृणान इषं जरित्रे नद्योऽं न पीपेः ।
अकारि ते हरिवो ब्रह्म नव्यं धिया स्याम रथ्यः सदासाः ११

(२५) पञ्चविंशं सूक्तम्

(१-८) अष्टर्चस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

को अद्य नयो देवकाम उशनिन्द्रस्य सख्यं जुजोष ।

को वा महेऽवसे पार्याय समिद्धे अग्रौ सुतसौम ईष्टे १
 को नानाम् वर्चसा सोम्याय मनायुर्वा भवति वस्त उस्त्राः ।
 क इन्द्रस्य युज्यं कः सखित्वं को भ्रात्रं वष्टि कवये क ऊती २
 को देवानामवो अद्या वृणीते क आदित्याँ अदितिं ज्योतिरीष्टे ।
 कस्याँश्चिनाविन्द्रो अग्निः सुतस्यां ऽशोः पिबन्ति मनसाविवेनम् ३
 तस्मा अग्निभरितः शर्म यंस ज्ञचोक पश्यात् सूर्यमुच्चरन्तम् ।
 य इन्द्राय सुनवामेत्याह नरे नर्याय नृतमाय नृणाम् ४
 न तं जिनन्ति बहवो न दभ्रा उर्वस्मा अदितिः शर्म यंसत् ।
 प्रियः सुकृत् प्रिय इन्द्रे मनायुः प्रियः सुप्रावीः प्रियो अस्य सोमी ५
 सुप्राव्यः प्राशषाळेष वीरः सुष्वैः पक्तिं कृणुते केवलेन्द्रः ।
 नासुष्वेरापिर्न सखा न जामि दुष्प्राव्योऽवहन्तेदवाचः ६
 न रेवता पणिना सख्यमिन्द्रो ऽसुन्वता सुतपाः सं गृणीते ।
 आस्य वेदः खिदति हन्ति नृगं वि सुष्वये पक्तये केवलो भूत् ७
 इन्द्रं परेऽवरे मध्यमास इन्द्रं यान्तो ऽवसितास इन्द्रम् ।
 इन्द्रं क्षियन्त उत युध्यमाना इन्द्रं नरो वाजयन्तो हवन्ते ८

(२६) षड्विंशं सूक्तम्

(१-७) सप्तर्चस्यास्य सूक्तस्य (१-३) प्रथमादितृचस्य गौतमो वामदेव इन्द्रो वा
 (४-७) चतुर्थ्यादिचतसृणाञ्च गौतमो वामदेव ऋषिः । (१-३) प्रथमादितृचस्येन्द्र
 आत्मा वा (४-७) चतुर्थ्यादिचतसृणाञ्च श्येनो देवते । त्रिष्टुप् छन्दः
 अहं मनुरभवम् सूर्यश्चा ऽहं कक्षीवाँ ऋषिरस्मि विप्रः ।
 अहं कुत्समार्जुनेयं न्यूञ्जे ऽहं कविरुशना पश्यता मा १
 अहं भूमिमददामार्याया ऽहं वृष्टिं दाशुषे मर्त्याय ।
 अहमपो अनयं वावशाना मर्म देवासो अनु केतमायन् २
 अहं पुरौ मन्दसानो व्यैरं नव साकं नवतीः शम्बरस्य ।
 शततमं वेश्यं सर्वताता दिवोदासमतिथिग्वं यदावम् ३
 प्र सु ष विभ्यो मरुतो विरस्तु प्र श्येनः श्येनेभ्य आशपत्वा ।
 अचक्रया यत् स्वधया सुपर्णो हव्यं भरन्मनवे देवजुष्टम् ४
 भरद् यदि विरतो वेविजानः पथोरुणा मनोजवा असर्जि ।
 तूयं ययौ मधुना सोम्येनो त श्रवो विविदे श्येनो अत्र ५

ऋजीपी श्येनो ददमानो अंशं परावतः शकुनो मन्द्रं मदम् ।
सोमं भरद् दादृहाणो देवानान् दिवो अमुष्मादुत्तरादादाय ६
आदाय श्येनो अभरत् सोमं सहस्रं सर्वा अयुतं च साकम् ।
अत्रा पुरंधिरजहादराती मदे सोमस्य मूरा अमूरः ७

(२७) सप्तविंशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । (१-४) प्रथमादिचतुर्भृचां
श्येनः (५) पञ्चम्याश्च श्येन इन्द्रो वा देवता । (१-४) प्रथमादिचतुर्भृचां त्रिष्टुप्
(५) पञ्चम्याश्च शक्वरी छन्दसी

गर्भे नु सन्नन्वेषामवेद महं देवानां जनिमानि विश्वा ।
शतं मा पुर आर्यसीररक्षन्नर्धं श्येनो जवसा निरदीयम् १
न घा स मामप जोषं जभारा ऽभीमास त्वक्षसा वीर्येण ।
ईर्मा पुरंधिरजहादराती रुत वाता अतरच्छूशुवानः २
अव यच्छ्येनो अस्वनीदध द्यो वि यद् यदि वात ऊहः पुरंधिम् ।
सृजद् यदस्मा अव ह क्षिपज्यां कृशानुरस्ता मनसा भुरगयन् ३
ऋजिप्य ईमिन्द्रावतो न भुज्युं श्येनो जभार बृहतो अधि ष्णोः ।
अन्तः पतत् पतत्र्यस्य पूर्णं मधु यामनि प्रसितस्य तद् वेः ४
अर्धं श्वेतं कलशं गोभिरक्त मापिप्यानं मघवा शक्रमन्धः ।
अध्वर्युभिः प्रयतं मध्वो अग्र मिन्द्रो मदाय प्रति धत् पिबध्यै शूरो मदाय
प्रति धत् पिबध्यै ५

(२८) अष्टाविंशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । इन्द्र इन्द्रासोमौ वा देवते ।
त्रिष्टुप् छन्दः

त्वा युजा तव तत् सोम सख्य इन्द्रो अपो मनवे सस्रुतस्कः ।
अहन्नहिमरिणात् सप्त सिन्धू नपावृणोदपिहितेव खानि १
त्वा युजा नि खिदत् सूर्यस्येन्द्रश्चक्रं सहसा सद्य इन्द्रो ।
अधि ष्णुना बृहता वर्तमानं महो द्रुहो अप विश्वायु धायि २
अहन्निन्द्रो अदहदग्निरिन्द्रो पुरा दस्युन् मध्यंदिनादभीके ।
दुर्गे दुरोगे क्रत्वा न यातां पुरू सहस्रा शर्वा नि बर्हीत् ३

विश्वस्मात् सीमधुमाँ इन्द्र दस्यून् विशो दासीरकृणोरप्रशस्ताः ।
 अबाधेथाममृणतं नि शत्रून्विन्देथामपचितिं वधत्रैः ४
 एवा सत्यं मघवाना युवं त दिन्द्रश्च सोमोर्वमश्चयं गोः ।
 आदद्वृतमपिहितान्यश्नां रिरिचथुः चाश्चित् ततृदाना ५

(२९) एकोनत्रिंशं सूक्तम्

(१-५) पञ्चर्वस्यास्य सूक्तस्य गौतमो वामदेव ऋषिः । इन्द्रो देवता ।

त्रिष्टुप् छन्दः

आ नः स्तुत उप वाजैभिरूती इन्द्र याहि हरिभिर्मन्दसानः ।
 तिरश्चिदुर्यः सर्वना पुरुरया ङ्क्षेभिर्गृणानः सत्यराधाः १
 आ हि ष्मा याति नर्यश्चिकित्वान् हूयमानः सोतृभिरुप यज्ञम् ।
 स्वश्चो यो अर्भीरुर्मन्यमानः सुष्वारोभिर्मदति सं ह वीरैः २
 श्रावयेदस्य कर्णा वाजयध्यै जुष्टामनु प्र दिशं मन्दयध्यै ।
 उद्वावृषाणो राधसे तुविष्मान् करन्न इन्द्रः सुतीर्थाभयं च ३
 अच्छो यो गन्ता नाधमानमूती इत्था विप्रं हवमानं गृणन्तम् ।
 उप त्मनि दधानो धुर्यांशून् त्सहस्राणि शतानि वज्रबाहुः ४
 त्वोतासो मघवन्नन्द्र विप्रा वयं तै स्याम सूरयो गृणन्तः ।
 भेजानासौ बृहद्विवस्य राय आकाय्यस्य दावने पुरुक्षोः ५

(३०) त्रिंशं सूक्तम्

(१-२४) चतुर्विंशत्युचस्यास्य सूक्तस्य गौतमो वामदेव ऋषिः । (१-८, १२-२४)
 प्रथमाद्यष्टर्चा द्वादश्यादित्रयोदशानाञ्चेन्द्रः (९-११) नवम्यादितृचस्य चेन्द्रोषसौ देवते

। (१-७, ९-२३) प्रथमादिसप्तर्चा नवम्यादिपञ्चदशानाञ्च गायत्री (८, २४)

अष्टमीचतुर्विंशोश्चानुष्टुप् छन्दसी

नकिरिन्द्र त्वदुत्तरो न ज्यायाँ अस्ति वृत्रहन् । नकिरेवा यथा त्वम् १
 सत्रा ते अनु कृष्टयो विश्वा चक्रेवं वावृतुः । सत्रा महां असि श्रुतः २
 विश्वे चनेदना त्वा देवास इन्द्र युयुधुः । यदहा नक्तमातिरः ३
 यत्रोत बाधितेभ्यश्चक्रं कुत्साय युध्यते । मुषाय इन्द्र सूर्यम् ४
 यत्र देवाँ ऋघायतो विश्वाँ अयुध्य एक इत् । त्वमिन्द्र वनूरहन् ५
 यत्रोत मर्त्याय क मरिणा इन्द्र सूर्यम् । प्रावः शचीभिरेतशम् ६

किमादुतासि वृत्रहन् मर्धवन् मन्युमत्तमः । अत्राह दानुमातिरः ७
 एतद् घेदुत वीर्यमिन्द्रं चकथ पौंस्यम् । स्त्रियं यद् दुर्हणायुवं वधीर्दुहितरं
 दिवः ८
 दिवश्चिद् घा दुहितरं महान् महीयमानाम् । उषासमिन्द्र सं इंपणक ९
 अपोषा अनसः सरत् संइंपष्टादहं बिभ्युषी । नि यत् सीं शिशनथद् वृषा १०
 एतदस्या अनः शये सुसंइंपष्टं विपाश्या । ससारं सीं परावतः ११
 उत सिन्धुं विबाल्यं वितस्थानामधि क्षमि । परिं ष्ठा इन्द्र मायया १२
 उत शुष्णास्य धृष्णुया प्र मृक्षो अभि वेदनम् । पुरो यदस्य सं इंपणक १३
 उत दासं कौलितरं बृहतः पर्वतादधि । अवाहन्निन्द्र शम्बरम् १४
 उत दासस्य वर्चिनः सहस्राणि शतावधीः । अधि पञ्च प्रधीरिव १५
 उत त्यं पुत्रमगुवः परावृक्तं शतक्रतुः । उक्थेष्विन्द्र आभजत् १६
 उत त्या तुर्वशायदू अस्नातारा शचीपतिः । इन्द्रो विद्वाँ अपारयत् १७
 उत त्या सद्य आर्या सरयोरिन्द्र पारतः । अर्णाचित्ररथावधीः १८
 अनु द्वा जहिता नयो ऽन्धं श्रोणं च वृत्रहन् । न तत् तै सुप्रमष्टवे १९
 शतमश्मन्मयीनां पुरामिन्द्रो व्यास्यत् । दिवोदासाय दाशुषे २०
 अस्वापयद् दभीतये सहस्रां त्रिंशतं हथैः । दासानामिन्द्रो मायया २१
 स घेदुतासि वृत्रहन् त्समान इन्द्र गोपतिः । यस्ता विश्वानि चिच्युषे २२
 उत नूनं यदिन्द्रियं करिष्या इन्द्र पौंस्यम् । अद्या नकिष्टदा मिनत् २३
 वामं वामं त आदुरे देवो ददात्वयमा । वामं पूषा वामं भगौ वामं देवः
 करूळती २४

(३१) एकत्रिंशं सूक्तम्

(१-१५) पञ्चदशर्चस्यास्य सूक्तस्य गौतमो वामदेव ऋषिः । इन्द्रो देवता । (१-
 २, ४-१५) प्रथमाद्वितीययोर्ऋचोश्चतुर्थ्यादिद्वादशानाञ्च गायत्री (३) तृतीयायाश्च
 पादनिचृच्छन्दसी

कया नश्चित्र आ भुव दूती सदावृधः सखा । कया शचिष्ठया वृता १
 कस्त्वा सत्यो मदानां मंहिष्ठो मत्सदन्धसः । दृळहा चिदारुजे वसु २
 अभी षु णः सखीना मविता जरितृणाम् । शतं भवास्यूतिभिः ३
 अभी न आ ववृत्स्व चक्रं न वृत्तमवतः । नियुद्धिश्चर्षणीनाम् ४
 प्रवता हि क्रतूना मा हा पदेव गच्छसि । अभक्षि सूर्ये सचा ५

सं यत् ते इन्द्र मन्यवः सं चक्राणि दधन्वरे । अध त्वे अध सूर्ये ६
 उत स्मा हि त्वामाहुरिन्मघवानं शचीपते । दातारमविदीधयुम् ७
 उत स्मा सद्य इत् परि शशमानाय सुन्वते । पुरु चिन्महसे वसु ८
 नहि ष्मा ते शतं चन राधो वरन्त आमुरः । न च्यौत्नानि करिष्यतः ९
 अस्माँ अवन्तु ते शत मस्मान् त्सहस्रमूतयः । अस्मान् विश्वा अभिष्टयः १०
 अस्माँ इहा वृणीष्व सख्याय स्वस्तये । महो राये दिवित्मते ११
 अस्माँ अविद्धि विश्वहेन्द्र राया परीणसा । अस्मान् विश्वाभिरूतिभिः १२
 अस्मभ्यं ताँ अपा वृधि वृजाँ अस्तैव गोमतः । नवाभिरिन्द्रोतिभिः १३
 अस्माकं धृष्णुया रथौ द्युमाँ इन्द्रानपच्युतः । गव्युरश्वयुरीयते १४
 अस्माकमुत्तमं कृधि श्रवौ देवेषु सूर्य । वर्षिष्ठं द्यामिवोपरि १५

(३२) द्वात्रिंशं सूक्तम्

(१-२४) चतुर्विंशत्यृचस्यास्य सूक्तस्य गौतमो वामदेव ऋषिः । (१-२२)
 प्रथमादिद्वाविंशत्यृचामिन्द्रः (२३-२४) त्रयोविंशीचतुर्विंशयोश्चेन्द्रस्याश्वौ देवताः ।

गायत्री छन्दः

आ तू न इन्द्र वृत्रह न्नास्माकमर्धमा गहि । महान् महीभिरूतिभिः १
 भूमिश्चिद् घासि तूतुजि रा चित्र चित्रिणीष्वा । चित्रं कृणोष्युतये २
 दुभ्रेभिश्चिच्छशीयांसं हंसि ब्राधन्तमोजसा । सखिभिर्भिये त्वे सचा ३
 वयमिन्द्र त्वे सचा वयं त्वाभि नौनुमः । अस्माँ अस्माँ इदुदव ४
 स नश्चित्राभिरद्रिवो ऽनवद्याभिरूतिभिः । अनाधृष्टाभिरा गहि ५
 भूयामो षु त्वावतः सखाय इन्द्र गोमतः । युजो वाजाय घृष्वये ६
 त्वं ह्येक ईशिष इन्द्र वाजस्य गोमतः । स नो यन्धि महीमिषम् ७
 न त्वा वरन्ते अन्यथा यद् दित्ससि स्तुतो मघम् । स्तोतृभ्य इन्द्र गिर्वणः ८
 अभि त्वा गोतमा गिरा ऽनूषत प्र दावने । इन्द्र वाजाय घृष्वये ९
 प्र ते वोचाम वीर्याँ या मन्दसान आरुजः । पुरो दासीरभीत्य १०
 ता ते गृणन्ति वेधसो यानि चकर्थ पौस्या । सुतेष्विन्द्र गिर्वणः ११
 अवीवृधन्त गोतमा इन्द्र त्वे स्तोमवाहसः । ऐषु धा वीरवद् यशः १२
 यच्चिद्धि शश्वतामसीन्द्र साधारणस्त्वम् । तं त्वा वयं हवामहे १३
 अर्वाचीनो वसो भवा ऽस्मे सु मत्स्वान्धसः । सोमानामिन्द्र सोमपाः १४
 अस्माकं त्वा मतीनामा स्तोम इन्द्र यच्छतु । अर्वागा वर्तया हरी १५

पुरोळाशं च नो घसौ जोषयासे गिरश्च नः । वधूयुरिव योषणाम् १६
सहस्रं व्यतीनां युक्तानामिन्द्रमीमहे । शतं सोमस्य खार्यः १७
सहस्रां ते शता वयं गवामा च्यावयामसि । अस्मत्रा राध एतु ते १८
दशं ते कलशानां हिरण्यानामधीमहि । भूरिदा असि वृत्रहन् १९
भूरिदा भूरि देहि नो मा दभ्रं भूर्या भर । भूरि घेदिन्द्र दित्ससि २०
भूरिदा ह्यसि श्रुतः पुरुत्रा शूर वृत्रहन् । आ नो भजस्व राधसि २१
प्र ते बभ्रू विचक्षणं शंसामि गोषणो नपात् । माभ्यां गा अनु शिश्रथः २२
कनीनकेव विद्रुधे नवे द्रुपदे अर्भके । बभ्रू यामेषु शोभेते २३
अरं म उस्त्रयाम्णे ऽरमनुस्त्रयाम्णे । बभ्रू यामेष्वस्त्रिधा २४

व० १-२७

३३-४५

चतुर्थोऽनुवाकः

(३३) त्रयस्त्रिंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । ऋभवो देवताः ।

त्रिष्टुप् छन्दः

प्र ऋभुभ्यो दूतमिव वाचमिष्य उपस्तिरे श्वैतरीं धेनुमीळे ।
ये वार्तजूतास्तरणिभिरेवैः परि द्यां सद्यो अपसौ बभूवुः १
यदारमक्रं नृभवः पितृभ्यां परिविष्टी वेषणा दंसनाभिः ।
आदिद् देवानामुप सख्यमायन् धीरांसः पुष्टिमवहन् मनायै २
पुनर्ये चक्रुः पितरा युवाना सना यूपैव जरणा शयाना ।
ते वाजो विभ्वाँ ऋभुरिन्द्रवन्तो मधुप्सरसो नोऽवन्तु यज्ञम् ३
यत् संवत्समृभवो गामरंजन् यत् संवत्समृभवो मा अपिशन् ।
यत् संवत्समभरन् भासौ अस्या स्ताभिः शमीभिरमृतत्वमाशुः ४
ज्येष्ठ आह चमसा द्वा करेति कनीयान् त्रीन् कृणवामेत्याह ।
कनिष्ठ आह चतुरस्करेति त्वष्टं ऋभवस्तत् पनयद् वचो वः ५
सत्यमूचुर्नर एवा हि चक्रु रनु स्वधामृभवो जग्मुरेताम् ।
विभ्राजमानांश्चमसाँ अहेवा ऽवैन्त् त्वष्टाँ चतुरो ददृश्वान् ६
द्वादश द्यून् यदगौह्यस्या ऽऽतिथ्ये रणं नृभवः ससन्तः ।
सुक्षेत्राकृणवन्नयन्त सिन्धून् धन्वातिष्ठन्नोषधीर्निम्नमापः ७

रथं ये चक्रुः सुवृतं नरेष्ठां ये धेनुं विश्वजुर्व विश्वरूपाम् ।
 त आ तन्नन्वृभवो रयिं नः स्वर्वसः स्वर्पसः सुहस्ताः ८
 अपो ह्येषामजुषन्त देवा अभि क्रत्वा मनसा दीर्घ्यानाः ।
 वाजो देवानामभवत् सुकर्मेन्द्रस्य ऋभुक्षा वरुणस्य विभ्वा ९
 ये हरी मेधयोक्था मर्दन्त इन्द्राय चक्रुः सुयुजा ये अश्वा ।
 ते रायस्पोषं द्रविणान्यस्मे धत्त ऋभवः क्षेमयन्तो न मित्रम् १०
 इदाहः पीतिमुत वो मर्द धुर्न ऋते श्रान्तस्य सख्याय देवाः ।
 ते नूनमस्मे ऋभवो वसूनि तृतीयै अस्मिन् त्सर्वने दधात ११

(३४) चतुस्त्रिंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । ऋभवो देवताः ।

त्रिष्टुप् छन्दः

ऋभुर्विभ्वा वाज इन्द्रो नो अच्छे मं यज्ञं रत्नधेयोप यात ।
 इदा हि वो धिषणा देव्यहा मधात् पीतिं सं मदा अगमता वः १
 विदानासो जन्मनो वाजरत्ना उत ऋतुभिर्ऋभवो मादयध्वम् ।
 सं वो मदा अगमत् सं पुरंधिः सुवीरामस्मे रयिमेरयध्वम् २
 अयं वो यज्ञ ऋभवोऽकारि यमा मनुष्वत् प्रदिवो दधिध्वे ।
 प्र वोऽच्छा जुजुषाणासो अस्थु रभूत विश्वे अग्रियोत वाजाः ३
 अभूदु वो विधते रत्नधेय मिदा नरो दाशुषे मर्त्याय ।
 पिबत वाजा ऋभवो ददे वो महिं तृतीयं सर्वनं मदाय ४
 आ वाजा यातोप न ऋभुक्षा महो नरो द्रविणसो गृणानाः ।
 आ वः पीतयोऽभिपित्वे अहा मिमा अस्तं नवस्व इव गमन् ५
 आ नपातः शवसो यातनोपे मं यज्ञं नमसा हूयमानाः ।
 सजोषसः सूरयो यस्य च स्थ मध्वः पात रत्नधा इन्द्रवन्तः ६
 सजोषा इन्द्र वरुणेन सोमं सजोषाः पाहि गिर्वणो मरुद्भिः ।
 अग्रेपाभिर्ऋतुपाभिः सजोषा ग्रास्पतीभी रत्नधाभिः सजोषाः ७
 सजोषस आदित्यैर्मादयध्वं सजोषस ऋभवः पर्वतेभिः ।
 सजोषसो देव्यैना सवित्रा सजोषसः सिन्धुभी रत्नधेभिः ८
 ये अश्विना ये पितरा य ऊती धेनुं तत्तुर्ऋभवो ये अश्वा ।
 ये असंत्रा य ऋधग्रोदसी ये विभ्वो नरः स्वपत्यानि चक्रुः ९

ये गोमन्तं वाजवन्तं सुवीरं रयिं धत्थ वसुमन्तं पुरुक्षुम् ।
ते अंग्रेपा ऋभवो मन्दसाना अस्मे धत्त ये च रातिं गृणन्ति १०
नापाभूत् न वोऽतीतृषामाऽनिःशस्ता ऋभवो यज्ञे अस्मिन् ।
समिन्द्रैण मदथ सं मरुद्भिः सं राजभी रत्नधेयाय देवाः ११

(३५) पञ्चत्रिंशं सूक्तम्

(१-६) नवर्चस्यास्य सूक्तस्य गौतमो वामदेव ऋषिः । ऋभवो देवताः ।

त्रिष्टुप् छन्दः

इहोप यात शवसो नपातः सौधन्वना ऋभवो मापं भूत ।
अस्मिन् हि वः सर्वने रत्नधेयं गमन्त्विन्द्रमनु वो मदासः १
आगन्नुभूणामिह रत्नधेयमभूत् सोमस्य सुषुतस्य पीतिः ।
सुकृत्या यत् स्वपस्यया चँ एकं विचक्र चमसं चतुर्धा २
व्यकृणोत् चमसं चतुर्धा सखे वि शिद्धेत्यब्रवीत् ।
अथैत वाजा अमृतस्य पन्थां गृणं देवानामृभवः सुहस्ताः ३
किंमयः स्विच्चमस एष आस यं काव्येन चतुरौ विचक्र ।
अथा सुनुध्वं सर्वनं मदाय पात ऋभवो मधुनः सोम्यस्य ४
शच्याकर्त पितरा युवाना शच्याकर्त चमसं दैवपानम् ।
शच्या हरी धनुतरावतष्टे न्द्रवाहावृभवो वाजरत्नाः ५
यो वः सुनोत्यभिपित्वे अह्नां तीव्रं वाजासुः सर्वनं मदाय ।
तस्मै रयिमृभवः सर्ववीर मा तद्गत वृषणो मन्दसानाः ६
प्रातः सुतमपिबो हर्यश्च माध्यंदिनं सर्वनं केवलं ते ।
समृभुभिः पिबस्व रत्नधेभिः सर्वीयाँ इन्द्र चकृषे सुकृत्या ७
ये देवासो अभवता सुकृत्या श्येना इवेदधि दिवि निषेद ।
ते रत्नं धात शवसो नपातः सौधन्वना अभवतामृतासः ८
यत् तृतीयं सर्वनं रत्नधेय मकृणुध्वं स्वपस्या सुहस्ताः ।
तदृभवः परिषिक्तं व एतत् सं मदैभिरिन्द्रियेभिः पिबध्वम् ९

(३६) षट्त्रिंशं सूक्तम्

(१-६) नवर्चस्यास्य सूक्तस्य गौतमो वामदेव ऋषिः । ऋभवो देवताः । (१-८)

प्रथमाद्यष्टर्चा जगती (६) नवम्याश्च त्रिष्टुप् छन्दसी

अनश्चो जातो अनभीशुरुक्थ्योऽं रथस्त्रिचक्रः परि वर्तते रजः ।
 महत् तद् वौ देव्यस्य प्रवाचनं द्यामृभवः पृथिवीं यच्च पुष्यथ १
 रथं ये चक्रुः सुवृतं सुचेतसो ऽविह्वरन्तं मनसस्पारि ध्यया ।
 तां ऊ न्वशस्य सर्वनस्य पीतय आ वौ वाजा ऋभवो वेदयामसि २
 तद् वौ वाजा ऋभवः सुप्रवाचनं देवेषु विभ्वो अभवन्महित्वनम् ।
 जिब्री यत् सन्ता पितरा सनाजुरा पुनर्युवाना चरथाय तक्षथ ३
 एकं वि चक्र चमसं चतुर्वयं निश्चर्मणो गामरिणीत धीतिभिः ।
 अथा देवेष्वमृतत्वमानश श्रुष्टी वाजा ऋभवस्तद् व उक्थ्यम् ४
 ऋभुतो रयिः प्रथमश्रवस्तमो वाजश्रुतासो यमजीजनन् नरः ।
 विभ्वतष्टो विदथेषु प्रवाच्यो यं देवासोऽवथा स विचर्षणिः ५
 स वाज्यर्वा स ऋषिर्वचस्यया स शूरो अस्ता पृतनासु दुष्टरः ।
 स रायस्पोषं स सुवीर्यं दधे यं वाजो विभ्वाँ ऋभवो यमाविषुः ६
 श्रेष्ठं वः पेशो अर्धि धायि दर्शतं स्तोमो वाजा ऋभवस्तं जुजुष्टन ।
 धीरासो हि ष्ठा क्वयौ विपश्चित् स्तान् व एना ब्रह्मणा वेदयामसि ७
 यूयमस्मभ्यं धिषणाभ्यस्परिं विद्वांसो विश्वा नर्याणि भोजना ।
 द्युमन्तं वाजं वर्षशुष्ममुत्तम मा नो रयिमृभवस्तक्षता वयः ८
 इह प्रजामिह रयिं रराणा इह श्रवो वीरवत् तक्षता नः ।
 येन वयं चितयेमात्यन्यान् तं वाजं चित्रमृभवो ददा नः ९

(३७) सप्तत्रिंशं सूक्तम्

(१-८) अष्टर्चस्यास्य सूक्तस्य गौतमो वामदेव ऋषिः । ऋभवो देवताः । (१-४)

प्रथमादिचतुर्मात्रां त्रिष्टुप् (५-८) पञ्चम्यादिचतसृणाञ्जानुष्टुप् छन्दसी

उप नो वाजा अध्वरमृभुक्षा देवा यात पृथिभिर्देवयानैः ।
 यथा यज्ञं मनुषो विद्ववाऽसु दधिध्वे रणवाः सुदिनेष्वहाम् १
 ते वौ हृदे मनसे सन्तु यज्ञा जुष्टासो अद्य घृतनिर्णिजो गुः ।
 प्र वः सुतासौ हरयन्त पूर्णाः क्रत्वे दक्षाय हर्षयन्त पीताः २
 त्र्युदायं देवहितं यथा वः स्तोमो वाजा ऋभुक्षणो ददे वः ।
 जुह्वे मनुष्वदुपरासु विद्वु युष्मे सचा बृहदिवेषु सोमम् ३
 पीवोअश्वाः श्चद्रथा हि भूताऽयःशिप्रा वाजिनः सुनिष्काः ।

इन्द्रस्य सूनो शवसो नपातो ऽनु वश्चेत्यग्रियं मदाय ४
 ऋभुर्भुक्षणो रयिं वाजै वाजिन्तमं युजम् ।
 इन्द्रस्वन्तं हवामहे सदासार्तममश्विनम् ५
 सेदृभवो यमवथ यूयमिन्द्रश्च मर्त्यम् ।
 स धीभिरस्तु सर्निता मेधसाता सो अर्वता ६
 वि नो वाजा ऋभुक्षणः पथश्चितन यष्टवे ।
 अस्मभ्यं सूरयः स्तुता विश्वा आशास्त्रीषणि ७
 तं नो वाजा ऋभुक्षण इन्द्र नासत्या रयिम् ।
 समश्च चर्षणिभ्य आ पुरु शस्त मघत्तये ८

(३८) अष्टात्रिंशं सूक्तम्

(१-१०) दशर्चस्यास्य सूक्तस्य गौतमो वामदेव ऋषिः । (१) प्रथमर्चो
 द्यावापृथिव्यौ (२-१०) द्वितीयादिनवानाञ्च दधिक्रा देवताः । त्रिष्टुप् छन्दः
 उतो हि वां दात्रा सन्ति पूर्वा या पूरुभ्यस्त्रसदस्युर्नितोशे ।
 क्षेत्रासां ददथुरुर्वरासां घनं दस्युभ्यो अभिभूतिमुग्रम् १
 उत वाजिनं पुरुनिषिध्वानं दधिक्रामु ददथुर्विश्वकृष्टिम् ।
 ऋजिप्यं श्येनं प्रुषितप्सुमाशुं चर्कृत्यमर्यो नृपतिं न शूरम् २
 यं सीमनु प्रवतैव द्रवन्तं विश्वः पूरुर्मदति हर्षमाणः ।
 पडिभर्गृध्यन्तं मेधयुं न शूरं रथतुरं वार्तमिव ध्रजन्तम् ३
 यः स्मारुन्धानो गध्यां समत्सु सनुतरश्चरति गोषु गच्छन् ।
 आविर्ऋजीको विदथा निचिक्यत् तिरो अरतिं पर्याप आयोः ४
 उत स्मैनं वस्त्रमथिं न तायुमनु क्रोशन्ति क्षितयो भरेषु ।
 नीचार्यमानं जसुरिं न श्येनं श्रवश्चाच्छा पशमच्च यूथम् ५
 उत स्मासु प्रथमः सरिष्यन् नि वैवेति श्रेणिभी रथानाम् ।
 स्रजं कृणवानो जन्यो न शुभ्वा रेणुं रेरिहत् किरणं ददश्वान् ६
 उत स्य वाजी सहृरिर्ऋतावा शुश्रूषमाणस्तन्वा समर्ये ।
 तुरं यतीषु तुरयन्नृजिप्यो ऽधि भ्रुवोः किरते रेणुमृञ्जन् ७
 उत स्मास्य तन्यतोरिव द्यो ऋघायतो अभियुजौ भयन्ते ।
 यदा सहस्रमभि षीमयोधीद् दुर्वतुः स्मा भवति भीम ऋञ्जन् ८
 उत स्मास्य पनयन्ति जनां जूतिं कृष्टिप्रो अभिभूतिमाशोः ।

उ॒तैन॑माहुः समि॒थे वि॒यन्तः॑ परा॑ दधि॒क्रा अ॑सरत् स॒हस्रैः॑ ६
आ दधि॒क्राः शर्व॑सा पञ्च॑ कृ॒ष्टीः सूर्य॑ इव॒ ज्योति॑षापस्त॒तान ।
सह॑स्रसाः श॒तसा॑ वा॒ज्यवा॑ पृ॒णक्तु॑ मध्वा॒ समि॑मा वचा॑सि १०

(३६) एकोनचत्वारिंशं सूक्तम्

(१-६) षडृचस्यास्य सूक्तस्य गौतमो वामदेव ऋषिः । दधिक्रा देवता । (१-५)

प्रथमादिपञ्चर्चा त्रिष्टुप् (६) षष्ठ्याश्चानुष्टुप् छन्दसी

आशुं दधि॒क्रां तमु॑ नु ष्ट॒वाम॑ दि॒वस्पृ॑थिव्या उ॒त च॑र्किराम ।
उ॒च्छन्ती॑र्मा॒मुषसः॑ सू॒दय॑ न्त्वति॒ विश्वा॑नि दुरि॒तानि॑ पर्षन् १
म॒हश्च॑र्क॒र्म्यर्व॑तः क्रतु॒प्रा दधि॑क्राव्णाः पु॒रुवार॑स्य वृ॒ष्णाः ।
यं पू॒रुभ्यो॑ दी॒दिवा॑सं नाग्निं द॒दथु॑र्मि॒त्रावरु॑णा ततु॒रिम् २
यो अ॒श्वस्य॑ दधि॒क्राव्णो॑ अ॒कारी॑त् समि॒द्धे अ॒ग्रा उ॒षसो॑ व्यु॒ष्टौ ।
अना॑गसं तमदि॒तिः कृ॑णोतु स मि॒त्रेण॑ वरु॒णेना॑ स॒जोषाः॑ ३
दधि॒क्राव्णा॑ इ॒ष ऊ॒र्जो म॒हो य॑ द॒र्मन्महि॑ म॒रुतां॑ नाम भ॒द्रम् ।
स्व॒स्तये॑ वरु॒णं इ॒म॒त्रम॒ग्निं ह॒वाम॑ह इन्द्रं व॒ज्रबा॑हुम् ४
इन्द्र॑मि॒वेदु॑भये वि ह॒यन्त॑ उ॒दीरा॑णा य॒ज्ञमु॑पप्र॒यन्तः॑ ।
दधि॒क्रामु॑ सू॒दनुं॑ म॒र्त्याय॑ द॒दथु॑र्मि॒त्रावरु॑णा नो अ॒श्वम् ५
दधि॒क्राव्णौ॑ अ॒कारि॑षं जि॒ष्णोर॑श्वस्य वा॒जिनः॑ ।
सु॒रभि॑ नो मु॒खा क॑रत् प्र ण आ॒र्यूषि॑ तारिषत् ६

(४०) चत्वारिंशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । (१-४) प्रथमादिचतुर्त्रुचां

दधिक्राः (५) पञ्चम्याश्च सूर्यो देवते । (१) प्रथमर्चस्त्रिष्टुप् (२-५)

द्वितीयादिचतसृणाञ्च जगती छन्दसी

दधि॒क्राव्णा॑ इ॒दु नु॑ च॒र्किराम॑ विश्वा॒ इन्मा॑मुषसः सू॒दयन्तु॑ ।
अ॒पाम॑ग्नेरु॒षसः॑ सूर्य॑स्य बृ॒हस्प॑तैराङ्गिर॒सस्य॑ जि॒ष्णोः॑ १
सत्वा॑ भरि॒षो ग॑वि॒षो दु॑व॒न्यस॑ च्छृ॒चफ॑द्रव॒स्यादि॑ष उ॒षस॑स्तुर॒णय॑सत् ।
स॒त्यो द्र॑वो द्र॒वरः॑ प॒तङ्ग॑रो दधि॒क्रावे॑ष॒मूर्जं॑ स्व॒र्जन॑त् २
उ॒त स्मा॑स्य द्र॒वत॑स्तुर॒णय॑तः पु॒र्णं न॑ वे॒रनु॑ वाति प्र॒गर्धि॑नः ।
श्ये॑नस्यैव ध्रज॑तो अ॒ङ्कसं॑ परि॒ दधि॑क्राव्णाः स॒होर्जा॑ तरि॒त्रतः॑ ३

उत स्य वाजी क्षिपणिं तुरणयति ग्रीवायां बद्धो अपिकक्ष आसनि ।
 क्रतुं दधिक्रा अनु संतवीत्वत् पथामङ्गांस्यन्वापनीफणत् ४
 हंसः शचिषद् वसुरन्तरिक्षस द्योता वेदिषदतिथिर्दुरोणसत् ।
 नृषद् वरसदृतसद् व्योमस दब्जा गोजा ऋतजा अद्रिजा ऋतम् ५

(४१) एकचत्वारिंशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । इन्द्रावरुणौ देवते ।

त्रिष्टुप् छन्दः

इन्द्रा को वां वरुणा सुम्रमापु स्तोमो हविष्माँ अमृतो न होता ।
 यो वां हृदि क्रतुमाँ अस्मदुक्तः पस्पर्शदिन्द्रावरुणा नमस्वान् १
 इन्द्रा ह यो वरुणा चक्र आपी देवौ मर्तः सख्याय प्रयस्वान् ।
 स हन्ति वृत्रा समिथेषु शत्रू नवोभिर्वा महद्भिः स प्र शृणवे २
 इन्द्रा ह रत्नं वरुणा धेष्टे तथा नृभ्यः शशमानेभ्यस्ता ।
 यदी सखाया सख्याय सोमैः सुतेभिः सुप्रयसा मादयैते ३
 इन्द्रा युवं वरुणा दिद्युमस्मि न्नोजिष्ठमुग्रा नि वधिष्टं वज्रम् ।
 यो नो दुरेवो वृकतिर्दभीति स्तस्मिन् मिमाथामभिभूत्योजः ४
 इन्द्रा युवं वरुणा भूतमस्या धियः प्रेतारा वृषभेवं धेनोः ।
 सा नो दुहीयद् यवसेव गृत्वी सहस्रधारा पर्यसा मही गौः ५
 तोके हिते तनय उर्वरासु सूरौ दृशीके वृषणश्च पौंस्यै ।
 इन्द्रा नो अत्र वरुणा स्यातामवोभिर्दस्मा परितक्म्यायाम् ६
 युवामिद्धयवसे पूर्वाय परि प्रभूती गविषः स्वापी ।
 वृणीमहे सख्याय प्रियाय शूरा मंहिष्ठा पितरैव शंभू ७
 ता वां धियोऽवसे वाजयन्ती राजिं न जग्मुर्यवयूः सुदानू ।
 श्रिये न गाव उपु सोममस्थु रिन्द्रं गिरो वरुणं मे मनीषाः ८
 इमा इन्द्रं वरुणं मे मनीषा अगमन्नुप द्रविणमिच्छमानाः ।
 उपैमस्थुर्जोष्टार इव वस्वो रध्वीरिव श्रवसो भिक्षमाणाः ९
 अश्वघस्य त्मना रथ्यस्य पुष्टे नित्यस्य रायः पतयः स्याम ।
 ता चक्राणा ऊतिभिर्नव्यसीभि रस्मत्रा रायो नियुतः सचन्ताम् १०
 आ नो बृहन्ता बृहतीभिरूती इन्द्र यातं वरुण वाजसातौ ।
 यद् दिद्यवः पृतनासु प्रक्रीळान् तस्य वां स्याम सनितार आजेः ११

(४२) द्विचत्वारिंशं सूक्तम्

(१-१०) दशर्चस्यास्य सूक्तस्य पौरुकुत्स्यस्त्रसदस्युर्ऋषिः । (१-६)
प्रथमादिषड्चामात्मा (७-१०) सप्तम्यादिचतसृणाञ्चेन्द्रावरुणौ देवताः ।

त्रिष्टुप् छन्दः

मम द्विता राष्ट्रं क्षत्रियस्य विश्वायोर्विश्वे अमृता यथा नः ।
क्रतुं सचन्ते वरुणस्य देवा राजामि कृष्टेरुपमस्य ववेः १
अहं राजा वरुणो मह्यं तान्यसुर्याणि प्रथमा धारयन्त ।
क्रतुं सचन्ते वरुणस्य देवा राजामि कृष्टेरुपमस्य ववेः २
अहमिन्द्रो वरुणस्ते महित्वो र्वी गंभीरे रजसी सुमेके ।
त्वष्टैव विश्वा भुवनानि विद्वान् त्समैरयं रोदसी धारयं च ३
अहमपो अपिन्वमुक्षमाणा धारयं दिवं सदन ऋतस्य ।
ऋतेन पुत्रो अदितेर्ऋतावो त त्रिधातु प्रथयद् वि भूम ४
मां नरः स्वश्वा वाजयन्तो मां वृताः समरणे हवन्ते ।
कृणोम्याजिं मघवाहमिन्द्र इयमि रेणुमभिभूत्योजाः ५
अहं ता विश्वा चकरं नकिर्मा दैव्यं सहो वरते अप्रतीतम् ।
यन्मा सोमासो ममदन्यदुक्थो भे भयेते रजसी अपारे ६
विदुष्टे विश्वा भुवनानि तस्य ता प्र ब्रवीषि वरुणाय वेधः ।
त्वं वृत्राणि शृशिवषे जघन्वान् त्वं वृताँ अरिणा इन्द्र सिन्धून् ७
अस्माकमत्र पितरस्त आसन् त्सप्त ऋषयो दौर्गहे ब्रध्यमाने ।
त आर्यजन्त त्रसदस्युमस्या इन्द्रं न वृत्रतुरमर्धदेवम् ८
पुरुकुत्सानी हि वामदाश ह्रव्येभिरिन्द्रावरुणा नमोभिः ।
अथा राजानं त्रसदस्युमस्या वृत्रहणं ददथुरर्धदेवम् ९
राया वयं संसवांसौ मदेम ह्रव्येन देवा यवसेन गावः ।
तां धेनुमिन्द्रावरुणा युवं नो विश्वाहा धत्तमनपस्फुरन्तीम् १०

(४३) त्रिचत्वारिंशं सूक्तम्

(१-७) सप्तर्चस्यास्य सूक्तस्य सौहोत्रौ पुरुमीळहाजमीळ्हावृषी । अश्विनौ देवते ।

त्रिष्टुप् छन्दः

क उं श्रवत् कतमो यज्ञियानां वन्दारु देवः कतमो जुषाते ।

कस्येमां देवीममृतैषु प्रेष्ठां हृदि श्रेषाम सुष्टुतिं सुहृव्याम् १
को मृळाति कतम आगमिष्ठो देवानामु कतमः शंभविष्ठः ।
रथं कर्माहुर्द्रवदक्षमाशं यं सूर्यस्य दुहितावृणीत २
मुक्षू हि ष्मा गच्छथ ईवतो द्यू निन्द्रो न शक्तिं परितक्म्यायाम् ।
दिव आजाता दिव्या सुपर्णा कया शचीनां भवथः शचिष्ठा ३
का वां भूदुपमातिः कया न आश्विना गमथो ह्यमाना ।
को वां महश्चित् त्यजसो अभीकं उरुष्यतं माध्वी दस्त्रा न ऊती ४
उरु वां रथः परि नक्षति द्या मा यत् समुद्रादभि वर्तते वाम् ।
मध्वा माध्वी मधु वां प्रुषायन् यत् सीं वां पृक्षौ भुरजन्त पक्वाः ५
सिन्धुर्ह वां रसया सिञ्चदश्वान् घृणा वयोऽरुषासः परि गमन् ।
तदू षु वामजिरं चैति यानं येन पती भवथः सूर्यायाः ६
इहेह यद् वां समना पंपृक्षे सेयमस्मे सुमतिर्वाजरत्ना ।
उरुष्यतं जरितारं युवं हं श्रितः कामो नासत्या युवद्रिक् ७

(४४) चतुश्चत्वारिंशं सूक्तम्

(१-७) समर्चस्यास्य सूक्तस्य सौहोत्रौ पुरुमीळहाजमीळहावृषी । अश्विनौ देवते ।

त्रिष्टुप् छन्दः

तं वां रथं वयमद्या हुवेम पृथुजयमश्विना संगतिं गोः ।
यः सूर्या वहति वन्धुरायुर्गिर्वाहसं पुरुतमं वसूयुम् १
युवं श्रियमश्विना देवता तां दिवो नपाता वनथः शचीभिः ।
युवोर्वपुरभि पृक्षः सचन्ते वहन्ति यत् ककुहासो रथे वाम् २
को वामद्या करते रातहव्य ऊतये वा सुतपेयाय वार्केः ।
ऋतस्य वा वनुषे पूर्व्याय नमो येमानो अश्विना ववर्तत् ३
हिरण्ययेन पुरुभू रथेने मं यज्ञं नासत्योप यातम् ।
पिबाथ इन्मधुनः सोम्यस्य दधथो रत्नं विधते जनाय ४
आ नो यातं दिवो अच्छा पृथिव्या हिरण्ययेन सुवृता रथेन ।
मा वामन्ये नि यमन् देवयन्तः सं यद् ददे नाभिः पूर्व्या वाम् ५
नू नो रयिं पुरुवीरं बृहन्तं दस्त्रा मिमाथामुभयेष्वस्मे ।
नरो यद् वामश्विना स्तोममावन् त्सधस्तुतिमाजमीळहासौ अगमन् ६

इहेहृ यद् वां समना पंपृक्षे सेयमस्मे सुमतिर्वाजरत्ना ।
उरुष्यतं जरितारं युवं हं श्रितः कामौ नासत्या युवद्रिक ७

(४५) पञ्चचत्वारिंशं सूक्तम्

(१-७) सप्तर्चस्यास्य सूक्तस्य गौतमो वामदेव ऋषिः । अश्विनौ देवते । (१-६)

प्रथमादिषडृचां जगती (७) सप्तम्याश्च त्रिष्टुप् छन्दसी

एष स्य भानुरुदियर्ति युज्यते रथः परिज्मा दिवो अस्य सानवि ।
पृक्षासौ अस्मिन् मिथुना अधि त्रयो दृतिस्तुरीयो मधुनो वि रंपशते १
उद् वां पृक्षासो मधुमन्त ईरते रथा अश्वास उषसो व्युष्टिषु ।
अपोर्णुवन्तस्तम् आ परीवृतं स्वर्णं शक्रं तन्वन्त आ रजः २
मध्वः पिबतं मधुपेभिरासभि रूत प्रियं मधुने युञ्जाथां रथम् ।
आ वर्तनिं मधुना जिन्वथस्पथो दृतिं वहेथे मधुमन्तमश्विना ३
हंसासो ये वां मधुमन्तो अस्त्रिधो हिरण्यपर्णा उहव उषर्बुधः ।
उदुप्रुतौ मन्दिनौ मन्दिनिस्पृशो मध्वो न मत्तः सर्वनानि गच्छथः ४
स्वध्वरासो मधुमन्तो अग्रय उस्त्रा जरन्ते प्रति वस्तोरश्विना ।
यन्निक्तहस्तस्तरणिर्विचक्षणः सोमं सुषाव मधुमन्तमद्रिभिः ५
आकेनिपासो अहभिर्दविध्वतः स्वर्णं शक्रं तन्वन्त आ रजः ।
सूरश्चिदश्वान् युयुजान ईयते विश्वाँ अनु स्वधया चेतथस्पथः ६
प्र वामवोचमश्विना धियंधा रथः स्वश्वौ अजरो यो अस्ति ।
येन सद्यः परि रजांसि याथो हविष्मन्तं तरणिं भोजमच्छ ७

पञ्चमोऽनुवाकः

सू० ४६-५८

(४६) षट्चत्वारिंशं सूक्तम्

(१-७) सप्तर्चस्यास्य सूक्तस्य गौतमो वामदेव ऋषिः । (१) प्रथमर्चो वायुः

(२-७) द्वितीयादिषण्णाञ्चेन्द्रवायू देवते । गायत्री छन्दः

अग्रं इंपबा मधूनां सुतं वायो दिविष्टिषु । त्वं हि पूर्वपा असि १
शतेनां नो अभिष्टिभिर्नियुत्वाँ इन्द्रसारथिः । वायो सुतस्य तृम्पतम् २
आ वां सहस्रं हरय इन्द्रवायू अभि प्रयः । वहन्तु सोमपीतये ३
रथं हिरण्यवन्धुरमिन्द्रवायू स्वध्वरम् । आ हि स्थायौ दिविस्पृशम् ४

रथेन पृथुपार्जसा दाश्वांसमुप गच्छतम् । इन्द्रवायू इहा गतम् ५
इन्द्रवायू अयं सुतस्तं देवेभिः सजोषसा । पिबतं दाशुषौ गृहे ६
इह प्रयाणमस्तु वामिन्द्रवायू विमोचनम् । इह वां सोमपीतये ७

(४७) सप्तचत्वारिंशं सूक्तम्

(१-४) चतुर्ऋचस्यास्य सूक्तस्य गौतमो वामदेव ऋषिः । (१) प्रथमर्चो वायुः

(२-४) द्वितीयादितृचस्य चेन्द्रवायू देवते । अनुष्टुप् छन्दः

वायौ शक्रो अयामि ते मध्वो अग्रं दिविष्टिषु ।
आ याहि सोमपीतये स्पार्हो देव नियुत्वता १
इन्द्रश्च वायवेषां सोमानां पीतिर्मर्हथः ।
युवां हि यन्तीन्दवो निम्नमापो न सध्वयक् २
वायुविन्द्रश्च शष्मिणां सरथं शवसस्पती ।
नियुत्वन्ता न ऊतय आ यातं सोमपीतये ३
या वां सन्ति पुरुस्पृहो नियुतो दाशुषे नरा ।
अस्मे ता यज्ञवाहसे न्द्रवायू नि यच्छतम् ४

(४८) अष्टचत्वारिंशं सूक्तम्

(१-५) पञ्चर्चस्यास्य सूक्तस्य गौतमो वामदेव ऋषिः । वायुर्देवता ।

अनुष्टुप् छन्दः

विहि होत्रा अवीता विपो न रायौ अर्यः ।
वायुवा चन्द्रेण रथेन याहि सुतस्य पीतये १
निर्युवाणो अशस्ती निर्युत्वा इन्द्रसारथिः ।
वायुवा चन्द्रेण रथेन याहि सुतस्य पीतये २
अनु कृष्णे वसुधिति येमाते विश्वपेशसा ।
वायुवा चन्द्रेण रथेन याहि सुतस्य पीतये ३
वहन्तु त्वा मनोयुजो युक्तासो नवतिर्नव ।
वायुवा चन्द्रेण रथेन याहि सुतस्य पीतये ४
वायौ शतं हरीणां युवस्व पोष्याणाम् ।
उत वां ते सहस्त्रिणो रथ आ यातु पार्जसा ५

(४६) एकोनपञ्चाशं सूक्तम्

(१-६) षडृचस्यास्य सूक्तस्य गौतमो वामदेव ऋषिः । इन्द्राबृहस्पती देवते ।

गायत्री छन्दः

इदं वामास्यै हविः प्रियमिन्द्राबृहस्पती । उक्थं मदश्च शस्यते १
 अयं वां परि षिच्यते सोमं इन्द्राबृहस्पती । चारुर्मदाय पीतये २
 आ न इन्द्राबृहस्पती गृहमिन्द्रश्च गच्छतम् । सोमपा सोमपीतये ३
 अस्मे इन्द्राबृहस्पती रयिं धत्तं शतृग्विनम् । अश्वावन्तं सहस्त्रिणाम् ४
 इन्द्राबृहस्पती वयं सुते गीर्भिर्हवामहे । अस्य सोमस्य पीतये ५
 सोममिन्द्राबृहस्पती पिबतं दाशुषौ गृहे । मादयेथां तदौकसा ६

(५०) पञ्चाशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । (१-६)

प्रथमादिनवर्चा बृहस्पतिः (१०-११) दशम्येकादश्योश्चेन्द्राबृहस्पती देवते । (१-६,

११) प्रथमादिनवर्चामेकादश्याश्च त्रिष्टुप् (१०) दशम्याश्च जगती छन्दसी

यस्तस्तम्भ सहसा वि ज्मो अन्तान् बृहस्पतिस्त्रिषधस्थो रवेण ।
 तं प्रत्नास ऋषयो दीध्यानाः पुरो विप्रा दधिरे मन्द्रजिह्वम् १
 धुनेतयः सुप्रकेतं मदन्तो बृहस्पते अभि ये नस्ततस्त्रे ।
 पृषन्तं सृप्रमदब्धमूर्वं बृहस्पते रक्षतादस्य योनिम् २
 बृहस्पते या परमा परावदत आ तं ऋतस्पृशो नि पैदुः ।
 तुभ्यं खाता अवृता अद्रिदुग्धा मध्वः श्रोतन्त्यभितौ विरपशम् ३
 बृहस्पतिः प्रथमं जायमानो महो ज्योतिषः परमे व्योमन् ।
 सप्तास्यस्तुविजातो रवेण वि सप्तरश्मि रधमत् तमांसि ४
 स सुष्टुभा स ऋक्वता गुरेन वलं रुरोज फलिगं रवेण ।
 बृहस्पतिरुस्त्रिया हव्यसूदः कनिक्रद्द् वावशतीरुदाजत् ५
 एवा पित्रे विश्वदेवाय वृष्णो यज्ञैर्विधेम नमसा हविर्भिः ।
 बृहस्पते सुप्रजा वीरवन्तो वयं स्याम पतयो रयीणाम् ६
 स इद् राजा प्रतिजन्यानि विश्वा शुष्मेण तस्थावभि वीर्येण ।
 बृहस्पतिं यः सुभृतं इंबभति वल्गूयति वन्दते पूर्वभार्जम् ७
 स इत् क्षैति सुधित ओकसि स्वे तस्मा इळा पिन्वते विश्वदानीम् ।
 तस्मै विशः स्वयमेवा नमन्ते यस्मिन् ब्रह्मा राजनि पूर्वं एति ८

अप्रतीतो जयति सं धनानि प्रतिजन्यानुत या सजन्या ।
 अवस्यवे यो वरिवः कृणोति ब्रह्मणे राजा तमवन्ति देवाः ६
 इन्द्रश्च सोमं इंपवतं बृहस्पते ऽस्मिन् यज्ञे मन्दसाना वृषणवसू ।
 आ वां विशन्त्विन्दवः स्वाभुवो ऽस्मे रयिं सर्ववीरं नि यच्छतम् १०
 बृहस्पत इन्द्र वर्धतं नः सचा सा वां सुमतिर्भूत्वस्मे ।
 अविष्टं धियो जिगृतं पुरंधी र्जजस्तमुर्यो वनुषामरातीः ११

अथाष्टमोऽध्यायः

। व० १-२६

(५१) एकपञ्चाशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । उषा देवता ।

त्रिष्टुप् छन्दः

इदमु त्यत् पुरुतमं पुरस्ता ज्योतिस्तमसो व्युनावदस्थात् ।
 नूनं दिवो दुहितरौ विभाती गातुं कृणवन्नुषसो जनाय १
 अस्थुरु चित्रा उषसः पुरस्ता न्मिता इव स्वरवोऽध्वरेषु ।
 व्यु वृजस्य तमसो द्वारो च्छन्तीरवृञ्चुचयः पावकाः २
 उच्छन्तीरद्य चितयन्त भोजान् राधोदेयायोषसौ मघोनीः ।
 अचित्रे अन्तः पणयः ससन्त्वबुध्यमानास्तमसो विमध्ये ३
 कुवित् स देवीः सनयो नवो वा यामो बभूयादुषसो वो अद्य ।
 येना नवगवे अङ्गिरे दशगवे सप्तस्यै रेवती रेवदूष ४
 यूयं हि देवीर्ऋतयुग्भिरश्वैः परिप्रयाथ भुवनानि सद्यः ।
 प्रबोधयन्तीरुषसः ससन्तं द्विपाञ्चतुष्पाञ्चरथाय जीवम् ५
 क्वं स्वदासां कतमा पुराणी यया विधानां विदधुर्ऋभूणाम् ।
 शुभं यच्छुभ्रा उषसश्चरन्ति न वि ज्ञायन्ते सदृशीरजुर्याः ६
 ता घा ता भद्रा उषसः पुरासु रभिष्टिद्युम्ना ऋतजतिसत्याः ।
 यास्वीजानः शशमान उक्थैः स्तुवञ्छंसन् द्रविणं सद्य आप ७
 ता आ चरन्ति समना पुरस्तात् समानतः समना पप्रथानाः ।
 ऋतस्य देवीः सदसो बुधाना गवां न सर्गा उषसौ जरन्ते ८
 ता इन्वेइव समना समानी रमीतवर्णा उषसश्चरन्ति ।
 गूहन्तीरभ्वमसितं रुशब्धिः शुक्रास्तनूभिः शुचयो रुचानाः ९

र॒यिं दि॒वो दु॒हितरो॑ वि॒भातीः॑ प्र॒जाव॑न्तं यच्छ॒तास्मासु॑ दे॒वीः ।
 स्यो॒नादा॑ वः॒ प्रति॑बु॒ध्यमा॑नाः सु॒वीर्य॑स्य॒ पत॑यः स्याम १०
 तद् वो॑ दि॒वो दु॒हितरो॑ वि॒भाती॑ रूपं ब्रुव॒ उष॑सो य॒ज्ञकै॑तुः ।
 व॒यं स्या॑म य॒शसो॑ जने॒षु तद् द्यौश्च॑ ध॒त्तां पृ॑थि॒वी च॑ दे॒वी ११

(५२) द्विपञ्चाशं सूक्तम्

(१-७) सप्तर्चस्यास्य सूक्तस्य गौतमो वामदेव ऋषिः । उषा देवता ।

गायत्री छन्दः

प्रति॑ ष्या॒ सू॒नरी॑ जनी॒ व्यु॒च्छन्ती॑ परि॒ स्वसुः॑ । दि॒वो अ॑दर्शि॒ दुहि॑ता १
 अ॒श्वैव॑ चि॒त्रारु॑षी॒ मा॒ता ग॒वा॒मृता॑वरी । सखा॑भूद्द॒श्विनो॑रु॒षाः २
 उ॒त सखा॑स्य॒श्विनो॑रु॒त मा॒ता ग॒वा॒मसि॑ । उ॒तोषो॑ वस्व॒ ईशि॑षे ३
 या॒व॒यद्द्वै॑षसं॒ त्वा चि॑क्कि॒त्वित् सू॑नृता॒वरि॑ । प्र॒ति स्तो॑मैर॒भुत्स॑महि ४
 प्र॒ति भ॒द्रा अ॑दृ॒क्षत् ग॒वां सर्गा॑ न॒ रश्म॑यः । ओ॒षा अ॑प्रा॒ उरु॑ ज॒यः ५
 आ॒प॒पु॒षी वि॑भा॒वरि॑ व्या॒व॒र्ज्योति॑षा॒ तमः॑ । उ॒षो अ॒नु स्व॑धा॒मव॑ ६
 आ॒ द्यां ते॑नोषि॒ रश्मि॑भि॒ रान्तरि॑क्ष॒मुरु॑ प्रि॒यम् । उ॒षः शु॒क्रेण॑ शो॒चिषा॑ ७

(५३) त्रिपञ्चाशं सूक्तम्

(१-७) सप्तर्चस्यास्य सूक्तस्य गौतमो वामदेव ऋषिः । सविता देवता ।

जगती छन्दः

तद् दे॒वस्य॑ स॒वि॒तु॒र्वायं॑ म॒हद् वृ॑णी॒महे॑ अ॒सुर॑स्य॒ प्रचै॑तसः ।
 छ॒र्दिर्ये॑न॒ दा॒शुषे॑ यच्छ॒ति त्म॑ना॒ तन्नो॑ म॒हाँ उ॑द॒यान् दे॒वो अ॒क्तु॑भिः १
 दि॒वो ध॒र्ता भु॑व॒नस्य॑ प्र॒जाप॑तिः पि॒शङ्गं॑ द्रा॒पिं प्र॑ति॒ मुञ्च॑ते क॒विः ।
 वि॒च॒क्ष॒णः प्र॑थ॒यन्ना॑पृ॒णन्नु॑र्व॒ जी॑जनत् स॒वि॒ता सु॑म्र॒मुक्थ्य॑म् २
 आ॒प्रा र॑जा॒सि दि॒व्यानि॑ पा॒र्थि॒वा श्लो॑कं दे॒वः कृ॑णुते॒ स्वाय॑ ध॒र्मणे॑ ।
 प्र॒ ब्रा॒ह्म अ॑स्त्राक् स॒वि॒ता स॒र्वी॒मनि॑ नि॒वेश॑यन् प्र॒सुव॑न्न॒क्तु॒भिर्जग॑त् ३
 अ॒दा॒भ्यो भु॑व॒नानि॑ प्र॒चाक॑शद् वृ॒तानि॑ दे॒वः स॒वि॒ताभि॑ र॒क्षते॑ ।
 प्रा॒स्त्राग्ब्रा॑ह्म भु॒व॒नस्य॑ प्र॒जाभ्यो॑ धृ॒तव॑तो म॒हो अ॒ज्म॑स्य॒ राज॑ति ४
 त्रि॒रन्तरि॑क्षं स॒वि॒ता म॑हि॒त्वना॑ त्री॒ रजा॑सि॒ परि॑भू॒स्त्रीणि॑ रो॒चना॑ ।
 ति॒स्रो दि॑वः पृथि॒वीस्ति॑स्र॒ इन्व॑ति॒ त्रि॒भिर्व॑तै॒रभि॑ नो॒ रक्ष॑ति॒ त्मना॑ ५
 बृ॒हत्सु॑म्रः प्र॒स॒वी॒ता नि॒वेश॑नो॒ जग॑तः॒ स्था॒तुरु॑भ॒यस्य॑ यो व॒शी ।

स नो देवः सविता शर्म यच्छ त्वस्मे क्षयाय त्रिवरूथमंहसः ६
आगन् देव ऋतुभिर्वर्धतु क्षयं दधातु नः सविता सुप्रजामिषम् ।
स नः क्षपाभिरहंभिश्च जिन्वतु प्रजावन्तं रयिमस्मे समिन्वतु ७

(५४) चतुष्पञ्चाशं सूक्तम्

(१-६) षडृचस्यास्य सूक्तस्य गौतमो वामदेव ऋषिः । सविता देवता । (१-५)

प्रथमादिपञ्चर्चा जगती (६) षष्ठ्याश्च त्रिष्टुप् छन्दसी

अभूद् देवः सविता वन्द्यो नु न इदानीमहं उपवाच्यो नृभिः ।
वि यो रत्ना भजति मानवेभ्यः श्रेष्ठं नो अत्र द्रविणं यथा दधत् १
देवेभ्यो हि प्रथमं यज्ञियैभ्यो ऽमृतत्वं सुवसिं भागमुत्तमम् ।
आदिद् दामानं सवितुर्व्यूणुषे ऽनूचीना जीविता मानुषेभ्यः २
अर्चिती यच्चकृमा दैव्ये जनैर्दीनैर्दक्षैः प्रभूती पूरुषत्वता ।
देवेषु च सवितुर्मानुषेषु च त्वं नो अत्र सुवतादनागसः ३
न प्रमियै सवितुर्दैव्यस्य तद् यथा विश्वं भुवनं धारयिष्यति ।
यत् पृथिव्या वरिमन्ना स्वङ्गुरिर्वर्ष्मन् दिवः सुवति सत्यमस्य तत् ४
इन्द्रज्येष्ठान् बृहद्भ्यः पर्वतेभ्यः क्षयाँ एभ्यः सुवसि पस्त्यावतः ।
यथायथा पतरन्तो वियेमिर एवैव तस्थुः सवितः सवायं ते ५
ये ते त्रिरहन् त्सवितः सवासो दिवेदिवे सौभगमासुवन्ति ।
इन्द्रो द्यावापृथिवी सिन्धुरद्भि रीदित्यैर्नो अदितिः शर्म यंसत् ६

(५५) पञ्चपञ्चाशं सूक्तम्

(१-१०) दशर्चस्यास्य सूक्तस्य गौतमो वामदेव ऋषिः । विश्वे देवा देवताः ।

(१-७) प्रथमादिसप्तर्चा त्रिष्टुप् (८-१०) अष्टम्यादितृचस्य च गायत्री छन्दसी

को वस्त्राता वसवः को वरूता द्यावाभूमी अदिते त्रासीथां नः ।
सहीयसो वरुण मित्र मर्तात् को वौऽध्वरे वरिवो धाति देवाः १
प्र ये धामानि पूर्व्याण्यर्चान् वि यदुच्छान् वियोतारो अमूराः ।
विधातारो वि ते दधुरजस्त्रा ऋतधीतयो रुरुचन्त दस्माः २
प्र पस्त्याऽमदितिं सिन्धुमकैः स्वस्तिमीळे सख्याय देवीम् ।
उभे यथा नो अहनी निपात उषासानक्ता करतामदब्धे ३
व्ययमा वरुणश्चेति पन्था मिषस्पतिः सुवितं गातुमग्निः ।

इन्द्राविष्णू नृवदु षु स्तवाना शर्म नो यन्तममवद् वरूथम् ४
 आ पर्वतस्य मरुतामवासि देवस्य त्रातुरंवि भर्गस्य ।
 पात् पतिर्जन्यादंहसो नो मित्रो मित्रियादुत न उरुष्येत् ५
 नू रौदसी अहिना बुध्यैन स्तुवीत देवी अप्यैभिरिष्टैः ।
 समुद्रं न संचरणे सनिष्यवो घर्मस्वरसो नद्योर्इ अप व्रन् ६
 देवैर्नो देव्यदितिर्नि पातु देवस्त्राता त्रायतामप्रयुच्छन् ।
 नहि मित्रस्य वरुणस्य धासि महामसि प्रमियं सान्वग्नेः ७
 अग्निरीशे वसव्यस्याइऽग्रमहः सौभगस्य । तान्यस्मभ्यं रासते ८
 उषो मघोन्या वह सूनृते वार्या पुरु । अस्मभ्यं वाजिनीवति ९
 तत् सु नः सविता भगो वरुणो मित्रो अर्यमा । इन्द्रो नो राधसा गमत् १०

(५६) षट्पञ्चाशं सूक्तम्

(१-७) सप्तर्चस्यास्य सूक्तस्य गौतमो वामदेव ऋषिः । द्यावापृथिव्यौ देवते ।

(१-४) प्रथमादिचतुर्ऋचां त्रिष्टुप् (५-७) पञ्चम्यादितृचस्य च गायत्री छन्दसी
 मही द्यावापृथिवी इह ज्येष्ठै रुचा भवतां शचर्यद्विरकैः ।
 यत् सीं वरिष्ठे बृहती विमिन्वन् रुवद्धोक्षा पंप्रथानेभिरेवैः १
 देवी देवेभिर्यजते यजत्रै रमिनती तस्थतुरुक्षमाणे ।
 ऋतावरी अद्रुहा देवपुत्रे यज्ञस्य नेत्री शचर्यद्विरकैः २
 स इत् स्वपा भुवनेष्वास य इमे द्यावापृथिवी जजान ।
 उर्वी गभीरे रजसी सुमेकै अवंशे धीरः शच्या समैरत् ३
 नू रौदसी बृहद्विर्नो वरूथैः पत्नीवद्विरिषयन्ती सजोषाः ।
 उरूची विश्वै यजते नि पातं धिया स्याम रथ्यः सदासाः ४
 प्र वां महि द्यवी अभ्यु पस्तुतिं भरामहे । शुची उप प्रशस्तये ५
 पुनाने तन्वा मिथः स्वेन दक्षेण राजथः । ऊह्याथै सनादृतम् ६
 मही मित्रस्य साधथ स्तरन्ती पिप्रती ऋतम् । परि यज्ञं नि षैदथुः ७

(५७) सप्तपञ्चाशं सूक्तम्

(१-८) अष्टर्चस्यास्य सूक्तस्य गौतमो वामदेव ऋषिः । (१-३) प्रथमादितृचस्य

क्षेत्रपतिः (४) चतुर्थ्या ऋचः शुनः (५, ८) पञ्चम्यष्टम्योः शुनासीरौ (६-७)

षष्ठीसप्तम्योश्च सीता देवताः । (१, ४, ६-७)

प्रथमाचतुर्थीषष्ठीसप्तमीनामृचामनुष्टुप् (२-३, ८) द्वितीयातृतीयाष्टमीनां त्रिष्टुप्

(५) पञ्चम्याश्च पुर उष्णिक छन्दांसि

क्षेत्रस्य पतिना वयं हितेनैव जयामसि ।
 गामश्च पोषयित्वा स नो मृळातीदृशै १
 क्षेत्रस्य पते मधुमन्तमूर्मि धेनुरिव पयो अस्मासु धुक्व ।
 मधुश्चुतं घृतमिव सुपूत मृतस्य नः पतयो मृळयन्तु २
 मधुमतीरोषधीर्द्याव आपो मधुमन्नो भवत्वन्तरिक्षम् ।
 क्षेत्रस्य पतिर्मधुमान् नो अस्त्व रिष्यन्तो अन्वेनं चरेम ३
 शनं वाहाः शनं नरः शनं कृषतु लाङ्गलम् ।
 शनं वरत्रा बध्यन्तां शनमष्टामुदिङ्गय ४
 शुनासीराविमां वाचं जुषेथां यद् दिवि चक्रथुः पर्यः ।
 तेनेमामुप सिञ्चतम् ५
 अर्वाची सुभगे भव सीते वन्दांमहे त्वा ।
 यथा नः सुभगासंसि यथा नः सुफलासंसि ६
 इन्द्रः सीतां नि गृह्णातु तां पूषानु यच्छतु ।
 सा नः पर्यस्वती दुहा मुत्तरामुत्तरां समाम् ७
 शनं नः फाला वि कृषन्तु भूमिं शनं कीनाशा अभि यन्तु वाहैः ।
 शनं पर्जन्यो मधुना पर्योभिः शुनासीरा शनमस्मासु धत्तम् ८

(५८) अष्टपञ्चाशं सूक्तम्

(१-११) एकादशर्चस्यास्य सूक्तस्य गौतमो वामदेव ऋषिः । अग्निः सूर्यो वाऽऽपो

वा गावो वा घृतं वा देवता । (१-१०) प्रथमादिदशर्चा त्रिष्टुप् (११)

एकादश्याश्च जगती छन्दसी

समुद्रादूर्मिर्मधुमाँ उदार दुपांशुना सममृतत्वमानट् ।
 घृतस्य नाम गुह्यं यदस्ति जिह्वा देवानाममृतस्य नाभिः १
 वयं नाम प्र ब्रवामा घृतस्याऽस्मिन् यज्ञे धारयामा नमोभिः ।
 उप ब्रह्मा शृण्वच्छस्यमानं चतुःशृङ्गोऽवमीद् गौर एतत् २
 चत्वारि शृङ्गा त्रयो अस्य पादा द्वे शीर्षे सप्त हस्तासो अस्य ।
 त्रिधा बद्धो वृषभो रौरवीति महो देवो मर्त्याँ आ विवेश ३
 त्रिधा हितं पृणिभिर्गुह्यमानं गवि देवासौ घृतमन्वविन्दन् ।

इन्द्र एकं सूर्य एकं जजान वेनादेकं स्वधया निष्टतक्षुः ४
 एता अर्षन्ति हृद्यात् समुद्रा च्छतव्रजा रिपुणा नावचक्षे ।
 घृतस्य धारा अभि चाकशीमि हिरण्ययौ वेतसो मध्य आसाम् ५
 सम्यक् स्रवन्ति सरितो न धेना अन्तर्हृदा मनसा पूयमानाः ।
 एते अर्षन्त्यूर्मयो घृतस्य मृगा इव क्षिपणोरीषमाणाः ६
 सिन्धौरिव प्राध्वने शूघनासो वातप्रमियः पतयन्ति युहाः ।
 घृतस्य धारा अरुषो न वाजी काष्ठा भिन्दन्नुर्मिभिः पिन्वमानः ७
 अभि प्रवन्त समनेव योषाः कल्याणयश्ः स्मयमानासो अग्रिम् ।
 घृतस्य धाराः समिधौ नसन्त ता जुषाणो हर्यति जातवेदाः ८
 कन्या इव वहतुमेतवा उ अञ्जयञ्जाना अभि चाकशीमि ।
 यत्र सोमः सूयते यत्र यज्ञो घृतस्य धारा अभि तत् पवन्ते ९
 अभ्यर्षत सुष्टुतिं गव्यमाजि मस्मासु भद्रा द्रविणानि धत्त ।
 इमं यज्ञं नयत देवता नो घृतस्य धारा मधुमत् पवन्ते १०
 धामन् ते विश्वं भुवनमधि श्रित मन्तः समुद्रे हृद्यन्तरायुषि ।
 अपामनीके समिथे य आभृत स्तमश्याम् मधुमन्तं त ऊर्मिम् ११

इति चतुर्थं मण्डलं समाप्तम्

मंत्र — संख्या तृतीयमंडलस्यान्तपर्यन्तं ३०५२
 चतुर्थमंडलस्य ५८६ सर्वयोगः ३६४१